

یومیہ حشریہ

تألیف

فوقیہ خضر

طبعة ٢٠١٩

خضر، فوقية

يوميات حشرية: / فوقية خضر؛ - الجيزة: أطلس للنشر والإنتاج
الإعلامي، ٢٠١٨.

١٧٦ ص، ٢٠ سم

تدمك: ٩٧٨ ٩٧٧ ٣٩٩ ٧٤٠٣

١- القصص العربية القصيرة ٢- القصص الاجتماعية ٣- الاهاجي
والفاكهات

أ- العنوان

یومیہ حشریہ

تألیف

فوقیہ خضر



الكتاب : يوميات حشرية

المؤلف : فوقية خضر

الغلاف : عصام محمد

الناشر : أطلس للنشر والإنتاج الإعلامي ش.م.م

٢٥ ش وادي النيل - المهندسين - الجيزة

sales@atlasdic.com

www.atlas-publishing.com

تليفون : ٣٣٠٤٢٤٧١ - ٣٣٠٢٧٩٦٥ - ٣٣٤٦٥٨٥٠

فاكس : ٣٣٠٢٨٣٢٨

أطلس للنشر والإنتاج الإعلامي ش.م.م

عادل المصري

عصام محمد

أطلس للنشر والإنتاج الإعلامي ش.م.م

نوران المصري

رقم الإيداع

٢٠١٨/٢٣٢٥٧

الترقيم الدولي

٩٧٨-٩٧٧-٣٩٩-٧٤٠-٣

الطبعة الاولى

طبعة ٢٠١٩

مقصد

تناولت الكاتبة فوقية خضر مشاكل المجتمع المصري وقدمته في إطار ساخر من خلال ابطال شخصيات كتابها وخصوصا الشخصية الرئيسة في العمل المتمثلة في أم أمل .

أجادت فوقية خضر انتقاء الألفاظ واللغة واللهجة الدارجة في المجتمع المصري وخصوصا في الحارة المصرية، وانتقاء الموضوعات بحرفية عالية لتقدم لنا حشرية كمنظومه سرديه أقرب إلي الشعرية. لا تنتمي فوقية خضر في كتابتها إلي مدرسة واحدة بل جمعت بين مدارس شتى

وأعتقد انها جمعت ما بين حرف فؤاد نجم النارية وحبكة فؤاد حداد وحكي بيرم التونسي من حيث سلاسة الحكي والتوضيح وأيضا براعة سيد حجاب جمعت فوقية خضر منظومتها المبدعة حشرية وقدمتها لكم .

تمنياي بقرائه محمدا

الكاتب الروائي / رفيق ابو حسن

الحلقة الأولى

يوميات حشرية

رمضان كريم

- أم أمل: ماشية بتدلع صباح الخير يابو أمل
- أبو أمل: أهو صباح
- أم أمل: مالك يا راجل بقولك صباح الخير ياخويا كل سنة وأنت طيب
- أبو أمل: يدير ظهره ويتكلم بطريقة مش مفهومة
- أم أمل: هو أنت مالك يا راجل بتعاملني كدة ليه معاملة الرغيف البايث
- أبو أمل: مهو أصل أنا عارفة كل سنة وأنت طيب وبعدين هتفضلني تتحنجلي لحد ما تقولي عاوزين ياميش رمضان والذي منه
- أم أمل: ياما إعملي حسابك، زكريا جاي يفطر معانا النهاردة
- أم أمل: يجى ياخشى اوعي كدة لما أشوف أبوكى بيقول إيه

- أم أمل: هو أنت يا راجل مستتيني لما أقولك كل سنة وأنت طيب علشان تفكر تجيب اليايمش طب ده شهر من السنة للسنة كمان عاوز تحرم اسم الله عليهم أمل وحماسة من دخلتك عليهم بشوية المكسرات
- أبو أمل: مكسرات إيه يا ولية ياللي يجيكي كسر نفوخك إنتي باين عليكى
- مخك ضرب، هو أنا يا ولية باخد كام عشان أروح أجيبك مكسرات بمرتبي كله
- أمل: ألبس إيه ياما لما يجى زكريا؟
- أم أمل: تتجاهل كلام أمل وتوجه كلامها لأبو أمل عينى عليا وعلى بختي المنيل ده أبو محمد اللي فوقينا طالع بشنط وكراتين مستفة مع إنه مراته ناقصة وما عندهاش دم، والولية أم أحمد راخرة طالعة قدامي وماسكة الشنط وبتداريها مني مع أنها هي اللي عينيها وحشة وولية أرارة
- أبو أمل: يا ولية عيب عليكى قاعدة للي طالع واللي نازل ما تسيبي الناس في حالها.
- أم أمل: قصدك إيه يا راجل هو أنا حشرية ده أنا حتى مابجش أجيب ف سيرة حد، طول عمرى ذي النسمة ماتطلعش من بوقي العيبة

- أمل: ألبس إيه ياما
- حماسة: ماتلبسي أى حاجة، لبسك عفريت، قلبه دماغنا ليه هلبس إيه هقلع إيه كأنك مخطوبة لمهند اجري ابت أعمل شاي
- أم أمل: شاي إيه يا منيل، أنت يا واد أنت مش صايم مش كفاية صاحي العصر والنبي مانفعلك صيام تعالي شوف اسم النبي حارسة وصاينه أبوك مش عاوز يجيبلنا ياميش رمضان
- حماسة: ياميش إيه يا حاجة هتفطرونا إيه النهاردة
- أم أمل: شوف الواد اللي ماعندوش دم وتوجه الكلام لأبو أمل وأنا ياخويا مش ذي أختك اللي جوزها ماعارف يجيبلها إيه ولا إيه ويتملها الرضا. ترضى هو أنا طول عمري بختي مايل مع إنني لا ببص لحد ولا أحب أتحشرف اللي مايخصنيش قطيعة والنبي أنا غلط ف إيه هو مش دة شهر مفترج مستخسر فينا نبقى ذينا ذي الناس يلا أهى عيشة والسلام



الحلقة الثانية

ولادة بنت أم أحمد

الشخصيات

أم أمل

أم محمد

أم أحمد

أبو أمل

المشهد الأول في شقة الثاني في مستشفى

أم محمد نازلة تجرى ع السلم

- أم أمل: مالك ياختشى رايحة فين كدة ع الصبح

- أم محمد: اسكتي ياختشي مش البت بنت أم أحمد بتولد

وخدوها المستشفى بعيد عنك جالها نزييف

- أم أمل: ليه ياختشى دة شايفها إمبراح ذي الفل ولا كان فيها

حاجة

- أم محمد: معلىش يأم أمل فتك بافية ياختشي

- أم أمل: استتي ياختشي هلبس عبايتي وأجي معاكي تدخل أم
أمل تزق أبو أمل
- أبو أمل: مالك ياوليه ف إيه وراكي مصيبة إيه مستعجلة
عليها
- أم أمل: مصيبة إيه ياراجل ماتحسن ملافظك ع الصبح دي
البت بنت أم أحمد بتولد وجالها نزيف
- أبو أمل: ياوليه طب إحنا مالنا ماتسيبي الناس ف حالهم
- أم أمل: ياخويا الناس لبعضيها اللي خلا جارتنا اللي فوقينا
أم محمد رايحة واحنا جيران الباب في الباب ماروحش دي
حتة تبقى عيبة
- أبو أمل: لاء ودة يصح روحى ياختي روحة بلا راجعة
- أم أمل: بت بتقول حاجة ياخويا
- أبو أمل: لاء دة أنا بقول واجب بردك
- أم محمد من الخارج: ماتيلا يأم أمل
- أم أمل ياختي اصبري متسربعة ع إية؟ عيني عليكى يادي
الشابة

- أم أمل وأم محمد مع أم أحمد ف المستشفى
- أم أمل: ماتخافيش ياختي والنبي ربنا هينتعا بالسلامة
- أم أحمد: سلامة إيه ياختشى المرة دي ماينلهاش سلامة دة
البت مش لاقين لها كيس دم
- أم أمل: دي النيلة مشتشفى طويلة عريضة وماعندهاش دم
- أم أحمد: أيوة ياختشي عاوزين اللي يتبرع
- أم أمل: والنبي ياختي لو ماعديش السكر كت اتبرعتلها
- أم أحمد: ياريت ع كدة بس دة حتى الواد عاوزينله حضانة
- أم أمل: يادي الخيبة إيه الوكسة دي يعني ولا دم ولا حضانة
دي مصيبة سودا ياختشي أمال ياختشي جوزها المنيل ع عينه
فين
- أم محمد: ياختشى سيبى الولية ف حالها
- أم أمل: إنتي مالك ياولية ياخشارية
- أم محمد: ياختشي أنا اتكلمت
- أم أحمد: ياختشى جوزها شغال اليوم بيومه وياريتيه ملاحق

- أم أمل: معلش ياختشى مهو إنتي ياختشى اللي غلطانة بنتك
ماكنش ليها الجوازة النيلة دي وع راى المثل قاعدة الخزانة ولا
الجوازة الندامة

- أم أحمد: ياخشى إنتي جاية تطمني ع البيت ولا جايه تقربي
عليه القديم والجديد

- أم أمل: ياختشى شوف الولية الناقصة بقى أنا سايبه اسم
النبي حارسة وصاينه جوزى واسم الله عليهم أمل وحماسة
وجاية اعمل الواجب والمره الباردة تكلمني كده قطيعة دة
مش بس المستشفى اللي ما عندهاش دم أنا مالى خليني ف
حالي أنا ما حبش أتحشر ف اللي ما يخلصنيش
فتكوا بعافية



الحلقة الثالثة

التكتوك

الشخصيات:

أم أمل

أبو أمل

أمل

حماسة

اللول

- أم أمل: قايمة الصبح كلها نشاط تتحدث لأمل: النهاردة الحد يابت يا أمل
- أقوم أعمله أكله الكوارع اللي بيحبها
- أم أمل: ياما كوارع إيه اللي بتلرز دي أنا ما بجهاش
- أم أمل: يا ختشي أنتوا بتفهموا ف الأكل جتكوا نيلة ع البربرجر والبتاعة الفطيرة اللي عاملة زي العيش الفينو دي اللي اسمها هي اسمها إيه يابت
- أم أمل: اسمها بتتا ياما باب الشقة يطرق بشدة

- أم أمل: إيه ده هو ف إيه مين الل بيخبط كدة جتوا خابط ف نفوخوا اجري يابت افتحى الباب، أبوكى نايم
- أمل تمشى بدلع
- أم أمل: يابت اتحركي شوف البت ومياصتها يابت اتحركي
- أمل: يووووو مآنا جآية أوو
- أمل تفتح الباب جرا ياواد يالول بتخبط كدة ليه هتكسر الباب
- اللول: إذيك يابرنسيسة فداكي ألف باب والنبي إنتي اللى منورة المنتشة كلها ياقمر
- أمل: اتلم ياواد يالول
- تخرج أم أمل مين يابت ياأمل
- أمل: ده الواد اللول ابن خالتشي أم عيلاء
- أم أمل: عاوز إيه ياواد يالول أمك ماتت
- اللول: أمي إيه خاااالتشي ده حماصة خدوه يالتكوك
- أم أمل: وقعتك سودا خدوه إزاي، هما مين دول اللي خدوه
- اللول: خدوه الاسم ياخالتشي
- أم أمل: اجرى يابت ياأمل صحي أبوكي

- أمل: بيقول سيبوني نااايم
- أم أمل: وهى تتجه لحجرة النوم نامت عليك حيطة يابعيد
قوم ياراجل شوف الواد خدوه الاسم
- أبو أمل: ياوليه دة إنتي صباحك ياخر حتى يوم أجازتي قلاتي
راحتي ربنا يقل راحتك
- أم أمل: بتقول حاجة ياخويا
- أبو أمل: لاء دة أنا بقول أديني قايم
- أم أمل: طب ياخويا ألبس الجلايبية المقلمة عشان تخش الاسم
بقيمتك وقل للبية العسكري اللى خد الواد إن الواد ابن ناس
وإنه متعلم ده أولى ثانوي صنايع اه ليفتكروا صايح ولا حاجة
تنظر أم أمل فتجد اللول ينظر لأمل وأمل تقف تهندم ف
شعرها
- أم أمل: أنت ياواد ياللي تنضرب يالول أنت لسة واقف عندك
ومالك متتح للبت كدة ليه ... اجرى قول ماتخفش ياحماسة
أبوك جيلك ف السكة وإنتى ياللي تتشكي يابت امشي
انجري خشى جوة اعملي لأخوكي شندوتشين ياخدهم أبوكي
وهو رايحلة تلاقيه ياقلب أمه ع لحم بطنه من غير أكل
- يرجع أبو أمل وحماسة

- أم أمل: مالك ياقلب أمك إيه اللي حصل ... عملوا فيك إيه
ياقلب أمك أوعي يكون حد مد إيده عليك حماسة يحط
إيدة ع قفاة ويقول حد يقدر يامادة ماتخلقش اسم الله
عليك يا حبيبي ... أمال خدوك ليه

- حماسة: لاء ياما دة أمين الشرطة وقفني وعاوز ياخذ
التكتوك بقوله طب ماترخصوهولنا ياباشا يقولي نعم ياروح
أمك رخصة ايه قتلته لاء كله إلا أمي ياباشا

- أم أمل: قلب أمك يا حبيبي طول عمرك راجل يا حماسة بكرة
الصبح أنزل للوليه أم حسن مهو ابنها حسن أمين شرطة أد
الدنيا ولو إنها وليه ناقصة وماقبلهاش بس هنعمل إيه .

- إن كان لك حاجة عند الكلب قوله ياسيدي ... يلا حبيبي روح
استحمي أحسن ريحتك ماتنطقش أروح أشوف الكوارع اللي
حطاها من إمبراح ع النار

يلااااااا فتكوا بعااااافية



الحلقة الرابعة

الشبكة

الشخصيات:

أم أمل

أبو أمل

أخت أبو أمل

أم العريس

العروسة

العريس

بعض الشخصيات لقاعدة الشبكة

صباح يوم جديد أبو أمل بيتكلم في التلفون

- أبو أمل: وماله ربنا يتمم بخير
- أم أمل: خير ياخويا مين اللي هيتجوز
- أبو أمل: يا وليه إنتي ع طول نطة ف زوري
- أم أمل: جرى إيه ياراجل مين الللى هيتجوز ماترد

- أبو أمل: أعوذ بالله منك وليه حشرية
- أم أمل: بتقول حاجة ياخويا
- أبو أمل: لاء ده أنا بقول البت عزة بنت أختي لسه جايلها عريس
- أم أمل: طب وأختك اللي ماعندهاش دم المرة الباردة مش تعزمني
- أبو أمل: تعزملك إيه ياولية بقولك لسه جاين يتفقوا
- أم أمل: يعني لو اتفقوا مش هيقروا الفاتحة
- أبو أمل: اطلعي منها إنتي بس وهما هيقروها
- أم أمل: بتقول حاجة ياخويا
- أبو أمل: لاء بقول هيقروءها
- أم أمل: بيقى رجلي ع رجلك أختك طول عمرها محظوظة وكعبها عالي
- أبو أمل: ياولية إنتي هتقري
- أم أمل: هو أختك الباردة دي بينفع فيها أر أنا فيها لاختيها

- أم أمل وأبو أمل داخله من بابا الشقة زغاريت.....
- تقابلهم أخت أبو أمل بتزغرتى ع إيه يأختي مش تستنى لما يتفقوا
- أم أمل: ياختشى هيتفقوا مالك متسربعة ع ايه
- اخ أبو أمل: ياختشي ولا متسربعة ولا حاجة بس لما يبقوا يتفقوا
- قاعدة تجمع الجميع وأم أمل قاعدة جنب أم العريس
- أبو العريس: إن شاء الله إحنا جاينين ناخذ بنتكوا لابننا
- أبو العروسة: ياألف مرحب البت بنتكوا والواد ابننا
- أبو العريس: طلباتكوا، احنا هنجيب الأوض وأنتوا عليكوا المطبخ
- أم أمل: آمال التجيد والستاير على مين؟
- أم العريس: تنظر بقرف ولم ترد ويرد أبو العريس
- أبو العريس: ياستى ماتفرقش إحنا نشيل الستاير والنجف والعروسة التجيد
- أبو أمل: وماله احنا بنشترى راجل

- أم أمل: طب والشبكة هتجيبولها ايه
- أخت أبو أمل اتخنقت منها ... ياختى سيبى الرجالة يتفقوا
- أبو العريس: احنا هنجيب غوشتين ودبلة ومحبس وخاتم
- أم أمل: تميل على أم العريس ياختى طب ماتجيبوا حتة حلق
مالكوا بخلة كدة ليه دي البت ذي القمر
- أم العريس تتعدلها: جرى إيه ياختى هو ف حد اليومين دول
بيجيب شبكة
- أم أمل: ومايجبلهاش شبكة ليه ياختشي هو احنا بنتنا شوية
دي البت صغيرة وابنك ماتاخذنيش يعنى ولا شكل ولا منظر
- أم العريس: ابني أنا لا شكل ولا منظر ده أنتوا اللي عالم
ماتتناسبوش قوم ياواد يلا ياخويا ... بلا قلة قيمة دول عالم
قللات الذوق
- أم أمل: ذوق مين يأم ذوق ده البت كل يوم بيجيلي بدل العريس
عشرة
- أم العريس: خلاص ياختي نقولها واحد م العشرة دول خناقة
وصوت عالي وينتهى الامر فانصراف عائلة العريس وسط
ذهول
- أخت أبو أمل ع قول حسبى الله ونعم الوكيل

- أم أمل: ماتحسبنيش ياخشى الله يسهلهم بنتك بكرة يجيها
سيد سيده

- أبو أمل ولا بيصد ولا بيرد

- أم أمل: مالك ياراجل خلاص غاروا ف داهية العالم البخلة
جت ع حته الحلق ناس جعانة وشح ودون

- أبو أمل: ماينطقش وهي واخداه ف إيديها ونازلة يلا ياختى
.....

اقعدوا بالعافية



الحلقة الخامسة

غسيل كلوي

الشخصيات:

أم أمل

أبو أمل

خميس

المستشفى وبعض الأشخاص

صباح يوم أم أمل قائمة تعبانة وبتشتكي من رجليها

- أم أمل: أنا نازلة يابو أمل المستشفى اكشف عظام

- أبو أمل: اهمدي شوية وبطلي لف من هنا هنا خلي رجليكي
ترتاح شوية .

- أم أمل: بقولك إيه يابو أمل ياخويا، أجل الخناق لما أرجع م
المستشفى وأنا هبقى أفكرك دة بدل ما تقوم تتغندر تيجى
معايا

- أبو أمل: أجي معاكي فين ياولية أنا فاضي أنا نازل أفتح
الورشة

- أم أمل: ماباخذش منك غير التريقة وقللة القيمة عمرك
ماسمعتي كلمة عدلة، ولا أقولك انزل ياخويا روح ورشتك دة
أنت حتى مايتخرجش بيك
- أبو أمل: ياولية لمي يومك اللي مالهوش ملامح محسساني
إني شنطة الخضار بتاعتك دهية تاخذك
- أم أمل: بتقول حاجة يابو أمل
- أبو أمل: لاء ده أنا بقول سلامتكم
- تنزل المستشفى تقابل خميس جوز بنت أم أحمد
- أم أمل: واد ياخميس
- خميس: إذيك ياخالتي
- أم أمل: إيه اللي جايبك ياواد المستشفى هي مراتك مش
ولدت وقامت بالسلامة والواد خرج م الحضانة
- خميس: ايوة ياخالتي
- أم أمل: أمال ياواد أنت جاي تعمل إيه تكنش المرة الناقصة
حماتك ربنا ابتلاها بمصيبة
- خميس: لاء ياخالتي دة النهاردة ميعاد غسيل الكلى بتاعي
والمششفى كلها مافهاش محلول الملح بتاع الغسيل

- أم أمل: يجيك واكسة يادى الواد ... بقى أنت ياموكوس سايب مراتك مانتخة ف البيت وجاى تغسل كلاويك ف المستشفى مراتك المعفنة ماتغسلهاش ليه
 - خميس ينظر لها بقرف ويسبها ويمشي
 - أم أمل: أنت ياواد يامتيل ع عينك بتبصلي كدة ليه طب ده الكلور والمسحوق بيخلى الغسيل ذي الفل
 - خميس: يشوح بايده ويكمل مشي
 - أم أمل: بلا خيبة ع رجالة اليومين دول شنبات وبس الواد سايب مراته وعاوز المستشفى تغسله كلاوية ،.....روح جتك داهية أنت ومراتك المعفنة وحماتك الولية الناقصة... أنا مالي خليني ف حالي ليقولوا عليه حشارية أروح الحق العظام....بلا كلاوي بلا فشة بلا ممبار
- فتكوا بعافية



الحلقة السادسة

الزمن الجميل

الشخصيات:

أم أمل

أبو أمل

أمل

حماسة

أم أمل تدخل ع حماسة بيذاكر وسماعات الموبايل ف ودانة
وبتنادى عليه

مش بيرد ... تقترب منه وتشد السماعات من ودانه

- أم أمل: أنت ياموكوس بتتيل إيه وترقص ع أغنية أديك ف
الأرض تفحر، أديك ف السقف تمحر وبعدين تصرخ ف وشه
يامتتيل ع عينك ماكت طلعت مبيض محارة ووفرت فلوس
الدروس اللى مشحنتانا .

- حماسة: هو إنتي ولا عجبك اذاكر ولا عجبك مزاكرش

- أم أمل: والنبي مانت نافع ابقى تعالى قابلني

- حماسة: أقبالك فين ياما تحدفه بحاجة ف إيديها
- تدخل تلاقي أمل قدام المرايا بترقص ع أغنية شارب كاسين
ودماغي مضبوطة واحد فراولة والتاني قوطة مطاردة
بين أمل وأمها لمحاولة ضربها ياخشى خشى اغسلي المواعين
..... فراولة وأوطة بتحبي خضري ولا فكهاني ياروح أمك
- أمل: ياما دي أغنية ...
- أم أمل: أغنية إيه ونيلة إيه لاء دة أنا لازم أشوف حل مع اسم
النبي حارسة وصاينه أبوكوا
- تدخل تلاقي أبو أمل بيشيش وببسمع أنا شارب سيجارة بنى
... حاسس أن دماغي بتاكلنيي.... قاعد ف الحارة بسقط
والغسيل عمال بينقط
- أم أمل: يادى الخيبة عليك يادي الراجل وأنا اللي جاى
اشكيلك م العيال أحبييه عليك راجل إيه اللي جراك ياراجل
أنت اتهبلت فين أم كلثوم وعبد الوهاب ولا قنديل طب ده أنت
كنت زمان بتقول شعر
- أبو أمل: طب مآنا لسه بقول شعر تعالي.. اقعدني جنبني
- أم أمل تقعد وهي فرحانة..... ويزقها ويبتدي يقول الشعر

- أبو أمل: يلا غوري جتك مصيبة دة إنتي ولية بجد خيبة
أكثر واحدة نكدية عاملة ست يامفترية..... والجيران مش
طايقة سيرتك أصلك واحدة حشارية واستبحطك تبقى
سودا لما ألاقكي ف أي أوضة يلا غورى وحلى عني ... أهيه
عيشة وغصب عني

- أم أمل: طب هقولك إيه ياراجل دة أنت عيشتك عيشة سودا
لما تكون واخذ أجازة .. يبقى يوم مالهش عازة خش قول
للبت كلمة ولا قول للواد يذاكرده أنت اللي يدور عليك يلاقيك
مأنتش فاكرهم ... أنت أب مالكش لازمة .. كل حاجة عاملها
أزمة عقدة وجاتلك من زمان لما أبوك ضربك بجزمة

- أبو أمل: يلا روحي وحلي عني أنت بجد حرقتي دمي أنا
اللي أستاهل

- ياكودة جبت لنفسى مصيبة سودا

- أم أمل: أنت ياما حفيت عليه ... كنت بتبوسلي ايديه .. كنت
رايح جاي بيتنا ربنا يسامحها أمك هي دي اللي غرقتي ..
يارتني ماوافقت خالص ولا حتى فضلت عانس

- يدخل حماصة ... يقول ... بس ياما بس يابا كل دة بسبب
الأغانى ... اهدوا وخفوا حبة مش هنسمع حاجة تاااانى ...

- أم أمل: يلا القصد والنهاية مش هنعملها حكاية .. فبين أيام
عبد الحليم اللّٰه ع الزمن الجميل.... يلا
اقعدوا بالعافية



الحلقة السابعة

أم زغلول

الشخصيات:

أم أمل

أبو أمل

أم زغلول

أسماعيل

أمل

طفلين

شقتين متقابلتين بفرش متواضع

صوت عياط أطفال وزعيق وصباح يوم جديد

- أم أمل: يابت يا أمل هو صوت الزعيق ده جاي منين

- أم أمل: ما عرفش يامادة تقريباً جاي من عند شقة خالتي أم

زغلول

- أم أمل: تقريبا ده إيه بت ... شويف إيه

- أبو أمل: يافتاح يا عليم يارزاق يا كريم ... يا ولية احنا مالنا
- أم أمل: احنا مالنا إزاي ياراجل ده الناس لبعضيها هو الراجل
ده مش هيتلم، كل شوية مبهدل ف الولية ... هي صحيح مرة
ناقصة بس النبي وصى ع سابع جار
- أبو أمل: النبي برئ منك ومن افعالك يا حشرية
- أم أمل: بتقول حاجة ياخويا
- أبو أمل: لاء أبدأ ده أنا بقول واجب بردوا
- أم أمل: ناولينى يا بت العباية أخش أشوف ف إيه
- أبو أمل: أعوذ بالله منك ولية
- أم أمل: بتقول حاجة ياخويا
- أبو أمل: لاء ده أنا بقول للبت بسرعة
- أم أمل تدخل تلاقى أم زغلول بتعيط وإسماعيل ضربها
- أم أمل: فى إيه ياختى ماتستهد بالله يا أبو زغلول
- أبو زغلول: يوجه الكلام لمراته أنا زهقت منك ومش طايق
عشتك هو ده تمامك معايا ... يلامى هدومي وع بيت أبوكي

- أم أمل: لاء ياخويا هو إيه الحكاية بالظبط وتتادي على أبو أمل م الشقة الثانية الحقنا يابو أمل وتوجه كلامها لأبو زغلول ياخويا هو خراب البيت شوية
- أبو أمل يدخل خير يا جماعة ماتصلوا ع النبي إيه يابو زغلول ماتروق ياراجل مفيش حلجة مستهلة
- أم زغلول: والنبي احضرنا يابو أمل ياخويا ينفع كل ماأطلب منه حاجة ضرب وإهانة وفرجة الناس
- أم أمل: هو إيه الموضوع من الأول
- أم زغلول: ياختي مضيع فلوسه ع الحشيش وع مزاجه والنبي مش العيال أولى بكل قرش
- أبو زغلول: ياوليه إنتي عاوزة تقلى مزاجي أنا بقولك جيبيلى من بيت أهلك مش كفاية مستحمل زنك وطلباتك إنتي وعيالك
- أم أمل: لاء ماتاخذنيش ياسماعيل ياخويا أنت ياخويا ماشي ع طريق ولو لجنة قفشتك هتروح ياخويا ف ستين داهية تروح فين الغلبانة دي هي والعيال لاء ياخويا أنت غلطان ليها حق تضايق

- أبو زغلول: أنا هطلقك وأرتاح من قرفك
- أم أمل: يوووة يأبو زغلول يعنى هي لو راحت بيت أهلها مش هتلاقي تاكل والنبي أنا لو منها ماقعد معاك بلا قلة قيمة
- أبو زغلول: ياولية إنتي ياتتكلمي كلمة عدلة ياتتكلى على الله إنتي إيه اللي بيحشرك بينا ... عجبك كدة ياولية
- أبو أمل: يلا بقى سبيهم ف حالهم سمعتينا الكلام
- أم أمل: أما صحيح راجل بارد ده أنا داخلة أهديهم يلا ياخويا إن شالله يولعوا ف بعض إحنا مالنا عارف يأبو أمل يا حبيبي أنت مليون عيوب الدنيا وكثير بتحدف كلام زي الدبش وساعات ما بتفهمش وكثير بتستعبط لما بطلب منك فلوس بس الحمد لله أنت أحسن من غيرك
- أبو أمل: ياولية إنتي خلتي فيه حاجة عدلة يعنى مش مكفيكي منكدة ع اللي جابوني داخلة تتحشرى بين الراجل ومراته يعنى أعمل فيكى إيه أقتلك وارتاح واريح الناس من شرك
- أم أمل: جرى إيه ياراجل هما حسدونا ولا إيه لاء ده أنا من الصبح أقوم امسح الشقة بمية وملح وأجيب شوية بخور وأبخر أنا مش عارفة الناس بصنلنا ع إيه مع انى ما بحبش أطقس ع حد ولا أدخل ف اللي ما يخصنيش

- أبو أمل: حسبى الله ونعم الوكيل
- أم أمل: بتقول حاجة يأبو أمل ياخويا
- أبو أمل: لاء ده أنا بقول بخرى
- أم أمل: يلا خلىني ف حالى أحسن

فتكوا بعافية



الحلقة الثامنة

السبوع

الشخصيات:

أم أمل

أبو أمل

أمل

حماسة

أم أحمد

بعض الأشخاص بالسبوع

صوت زغاريت وهيصة ع السلم

- أم أمل: هو في إيه مين هيتجوز ف العمارة الزغريت دي جاية

منين

- حماسة: ياما إحنا مالنا هو كان حد عزمنا

- أم أمل: يعزمونا إيه ياواد ياللي تتشك ده إحنا ف بيت واحد

هو إحنا عاوزين عزومة شوفيلي ف إيه يابت يا أمل

- أمل تجرى بسرعة تبص م العين السحرية
- أبو أمل: جتك داهية طالعة لأمك حشارية
- أم أمل: بتقول حاجة ياخويا
- أبو أمل: لاء ده أنا بقول أخش أأيل شوية
- أم أمل: خش ياخويا إلهي تنام ماتقوم
- أمل: إلحقي ياما ده سبوع البت بت خالتشي أم أحمد
- أم أمل: سبوع إيه يابت دة السبوع عدى ميعاده هي والدة يوم
إيه
- حماسة: ياما احنا مالنا إنتي شاغلة دماغك ليه مايعملوا
وقت مايعملوه
- أبو أمل: سيبها تروح تتحشر واهى بالمره تعرف أخبار باقي
الجيران
- أم أمل: ليه ياراجل دة أنا حتى بيقولوا عليه انى دايمًا ف
حالي هو أنت مش قلت هتدخل تتخمد ياخويا
- أمل: أجي معاكي ياما
- أم أمل: لاء خليكي إنتي اغسلي المواعين وشطبي المطبخ وأنا
أما أرجع أحكيلك إيه اللي حصل

- أبو أمل: ده إنتي وبنتك استغفر الله العظيم تموتوا ف الرمح
- أم أمل: بتقول حاجة ياخويا
- أبو أمل: لاء ده أنا بقول خشى اغسلى المواعين يا أمل
- أمل: وأنا مالى أنا عاوزة اروح اتفرج
- أم أمل: يابت اقعدي واهدي إنتي طالعة حشارية لمين
- حماسة: اه ياما صحيح هي طالعة حشارية لمين
- أم أمل: اخرس ياواد وخليك ف مذكركت ياموكوس اجري
يابت يا أمل حطيلي تلاتة كيلو سكر ف شنطة ولا إيه رأيكوا
أديها عشين جنية ف إيدها أهى تبقى عارفة اللي ليها واللي
عليها ولا أقولك السكر بردوا قيمة هاتي يابت واخصي قبل
مايرشوا الملح
- تدخل أم أمل فتجد بعض الجيران منهم أم محمد تتحدث
بصوت خافت
- شوف الولية اللي ما عندهاش دم الناقصة يعني كل الجيران
عارفين ميعاد السبوع وأنا لاء ماشي يا أم أحمد ليكي روقة
- أم أمل: هو أنتوا ياخشى اخترتوا السبوع كدة ليه ده عدى
كثير

- أم أحمد: أصله ياخشى قال يخرج يدور للواد ع اللبن الصناعي اللي كتبه الدكتور مش لاقية ف الصحة وف الأجزخانة عاوزين يدهوله بالغالي مع إنه ف الصحة بخمسة جنيه ونص
 - بس ماينزلش وف الأجزخانة بسبعة وتلاتين ونص هو .. هو نفس اللبن والواد غلبان ومش ملاحق
 - أم أمل: ياختى أكلي البت حته حلاوة ولا عرقين فجل ولا ابقى كتر لها ف المغات شوية
 - أم محمد: ياخشى أصلها كت فتح بطن وماعرفتش ترضع الواد
 - أم أمل: إنتي مالك ياولية ياشارية إنتي كان حد سالك
 - أم أحمد: مأنتى يأم أحمد من ساعة مادخلتلي وأنتي زي وكيل النيابة البت، حماتها، جوزها
 - أم أمل: ياخشى أنا غلطانة إنني بطمن عليها وتقوم تمشى وهى بتتكلم جتوا داهية جيران هم بلا نيلة عليكوا وع السبوع اللي يعر .. اللي لافيه بلحاية ولا حته خروف حطنلي فشار وسوداني طب دة أنا لما البت أمل تتجوز وتخلف هعمل سبوع يهد الدنيا واجيبكوا بقى تتفرجوا جتكوا الأرف جيران هم ... وأنا مالي خليني ف حالي أحسن
- أقعدهوا بالعااافية

- حماسة: ياما اعمليهاله وخليه ياكلها يكش تصلبله العضمتين
- أم أمل: اخرس ياواد ياكليل التربية والنبي لو عضم ف افة وهو صحيح عضم ف افة بس بردك اسمه أبوك.
- أبو أمل: مين ياولية اللي عضم ف أفة؟
- أم أمل: ياخويا أنت ودنك سالكة دة أنا بقول هقوم أعملك الكوارع
- أبو أمل: هخش أريح شوية لغاية ماتخلصي الغدا.
- أم أمل: وماله ياخويا خش ريح مش عيب.
- تدخل المطبخ وترجع تصحى أبو أمل الحق ياخويا دي الأمبوبة فاضية
- أبو أمل: دة إنتي وليه ماوركيش غير قلة الراحة ف إية ف يومك اللي مالهوش ملامح
- أم أمل: وأنا مالي ياراجل بقولك أنبوبة البوتجاز فضيت هو أنا كنت شربتها ماتحسن ملافظك ع الصبح
- أمل: ياما بتاع الأنابيب بيخبط

- أم أمل: اندهى عليه يابت بسرعة خليه يطلع أنبوبة بسرعة
يطلع بتاع الأنابيب شايل الأنبوبة
- بتاع الأنابيب: ياسا اتر
- أم أمل: تعال ياخويا أنت داخل حمام بيتكوا بكم ياخويا
الأمبوبة
- بتاع الأنابيب: بخمسة وتلاتين جنية ياست
- أم أمل: ليه ياخويا ده أنت ع رأي اسم النبي حارسة وصاينه
أبو أمل يومك مالهوش ملامح
- بتاع الأنابيب: طب ليه الغلط ده ياست
- أم أمل: ده أنا سمعاهم ف التليفزيون بوداني بيقلوا كل عيلة
ليها أنبوتين ف الشهر ع البطاقة الأنبوبة بعشة جنية
- بتاع الأنابيب: إنتي بتصدقي كلام التليفزيون روحى ياست
هاتيها م التليفزيون ده إيه وجع الدماغ ده ع الصبح
- أم أمل: بتقول إيه ياراجل أنت
- بتاع الأنابيب: مابقولش حاجة ياست عاوزة الأنبوبة ولا مش
عاوزاها

- أنا طالع للدور الرابع وأنتي تقوليلي عشة جنية يخرج أبو
أمل ياولية إنتي واقضة ترغي مع بتاع الأنابيب يلا يابني خد
انبوبتك واتكل ع الله مش عاوزين أنابيب
- أم أمل: مش عاوزين إزاي ياراجل أمال هنعمل الأكل ع ايه
- أبو أمل: يلا يابني اتكل ع الله أنا هنزل أغيرها م المستودع
- بتاع الأنابيب: أعوذ بالله منكم زباين حسبي الله ونعم الوكيل
فيكم زباين جعانين روح ياخويا غيرها م المستودع
- أم أمل: ياراجل أنت مشيت بتاع الأنابيب دي الكوارع عاوزالها
يوم بحاله ع النار
- أبو أمل: ياولية اجري ولعي باجور الجاز اللي امك جايباهولك
ف جهازك
- أم أمل: ينيلك راجل أنت اتهبلت والنبي ياخويا دة أنا رامية
من سنين ف البلكونة ولا حتى عندنا جاز نولعه.
- أبو أمل: ياولية إنتي الاهمال ف دمك مش قادرة تجيبى لتر
جاز تخلي ف البيت لوقت زى دة
- أم أمل: يادى الخيبة ياراجل أنا بقالي سنين مابولعهوش
أجيب الجاز لية

- يدخل أبو أمل ويلفح الأنبوبة ع كتفه ويخرج منك لله ولية
فيكي وف بتوع الأنابيب الله ينتقم منك ولية
- أم أمل: بتقول حاجة ياخويا
- أبو أمل: مابقلش
- ينزل أبو أمل ويرجع كم الجلابية مخلوع ومقطوعة من تحت
- أم أمل: مالك ياخويا أنت اتخانقت
- يتلموا الجميع ف صالة الشقة وحماسة مالك يابا مين اللي
اتخانق معاك وأنا أنزلوا
- أم أمل: مالك يابا
- أم أمل: ماتتطق ياراجل مين اللي عمل فيك كدة
- أبو أمل: المستودع كان زحمة أنا مش هقول غير كلمة واحدة
بس حسبي الله ونعم الوكيل ويتجه للخارج
- أم أمل: الراجل جاله تربنه ياولاد قطيعة تقطع الأنابيب ع
الكوارع
- يلااااافتكوا بعالي



الحلقة العاشرة

النت

الشخصيات:

أم أمل

أبو أمل

حماسة

أمل

أم أمل: أمام جهاز كمبيوتر بتكلم نفسها أما أفتح أشوف صحباتي يخرب أنتوا قاعدين م بدري بقى رغي ورحرحة لاء ده أنا أقوم أعمل حاجة أشربها وأرجع وهي خارجة تقابل حماسة يأخدوا بعض بالحضن

- أم أمل: إزيك يا حبيبي عامل إيه بقالي تلت تيام مابشوفكش

- حماسة: إنتي هتستعطي ياما مآنا كتبتك إمبراح عاوز أتعشى نفضتيلي

- أم أمل: أنا يقطعني والنبي ماشوفتك أصلي بخش ألاقي صحباتي وأصحابي سايينلى رسايل أد كدة.

- حماسة: أتاري كل ما قعد الأفيكي فاتحة ومابتساليش
- أم أمل: أصل بيني وبينك أبوك قارفني أول ما بيلاقيني فاتحة
عاوز شاي، عاوز قهوة، حضري لي فطار لما يبقى مش طايقة
نفسى ديك النهار قابلته واتغديت معاه يدوب اللقمة وبعدين
كل وراح جرى ع نته بس أحسن أهو مريحني من زنه
- حماسة: هو أما مش علمتك إزاي تفتحي أوف لايين
- أم أمل: والنبي نسيت ياواد بتتعمل إزاي أبقى تعالي فكرني
وعلمهاني تاني
- يخرج أبو أمل.
- أبو أمل: ياولية أنا مش قاعد أكلمك بقالي ساعة وأقولك
جعان قومي أعمليلي فطار
- أم أمل: هو أنا ياخويا شفتك دة أنا كنت نايمة
- أبو أمل: يا ولية نايمة إزاي ده أنا شايفك فاتحة وبتزلى
حاجات
- أم أمل: أنا ياخويا لا بعرف أنزل ولا أطلع أنا الحاجة اللي
بتعجبني بعملها مشاركة وبس
- أبو أمل: يعنى فاتحة

- حماسة: ياما هاتي فلوس أروح أذفع فلوس الوصلة
- أم أمل: ماتستني ياواد يومين مفيش معايا غير مصروف البيت
- حماسة: ياما كدة هيقطعوا الوصلة عننا
- أم أمل: لاء ياخويا استنى هجيبك الفلوس الشهر اللي فات قطعوا الوصلة يومين قاعدت بوزي ف بوز أبوك لما كنا هنولع ف بعض نذفع الفلوس أحسن
- أبو أمل: مالوا بوزي ياولية إنتي ع طول بتحدفي ديش
- أم أمل: ياراجل أنا كلمتك أنا ببقى زهقانة والننت بيفك الواحد شوية
- أبو أمل: دة إنتي ولية قاعدتك كلها نكد والننت بيرحميني منك
- أم أمل: لاء ده أنت يومك النهاردة مش معدي مالك يا راجل قلبك قوي وداخل فيه بالعريض
- أم أمل: إيه ياما صوتكوا عالي ليه ماكنا ارتاحنا من الخناق كل شوية
- أم أمل: ده إيه ده، وأنتى طلعتي منين ياحيلتها كتي فين ياللي تتشكي، ده أنا فاكراكي ف الجامعة

- أمل: جامعة إيه ياما النهاردة الجمعة
- أم أمل: هو أنتوا مخلينى دريانة بجمعة ولا سبت طالعين لأبوكوا مكبرين دماغكوا من كل حاجة واللي يدور عليكي يلاقيكي بترغي ف مآنا كل ماخش عليكي الايكي فاتحة التلافون ع النت
- أمل: ياما براجع المحضرات ع النت هرغي مع مين يعني
- أم أمل: مع اللي يتخفى زكريا بن عمك مهو من يوم ماقراً الفاتحة وهو مانزلش من ع ودانك يارغي ف التليفون يارغي ع النت ببقى شيفاكوا فاتحين أنتوا الاتنين
- أمل: ياما إنتي بتراقبيننا
- أم أمل: ولا هرقيبكوا ولا هنيلكوا والنبي مآنتى نافعة
- حماسة: ياما خلصتوا خناق ولا لسة
- أم أمل: ماتصبر ياواد مآنت راخر مش نافع وكل سنة تاخدها ف سنتين، ماوركش إلا النت، إلا قولى ياواد عملت إيه ف البت اللي كت مدوخال ع النت بقالها شهرين ومش عاوزة تديك تلافونها
- حماسة: ريحى نفسك ده طلع واحد صاحبي وببشتغلني

- أم أمل: مهو لو مش شايف إنك بتاع بنات وبتجري وري كل واحدة تكلمك ماكنش استهيفك ولعب بيك يابن الهبة.
- حماسة: يوووووة هتجيبوا فلوس الوصلة ولا أنزل وانشالله يقطعها، الجميع ف صوت واحد لالا لالا أوعى يقطعها
- قطيعة تقطع انت اللي خلانا نشوف بعض بالصدفة يلالا لالا فتكوا بعافية



الحلقة الحادية عشر

التأمين الصحي

الشخصيات:

أم أمل

أبو أمل

أم مينا

أبو مينا

بعض الأشخاص

يوم جديد شخص ينادي ... يامينا!!!..... أم أمل هو مين

اللى بينادي تحت

هو ف إيه يا ولااد

- أبو أمل: اسطبحننا وواستبح الملك لله... وأنتى مالك يا ولية

ماللي ينده...ينده

- أم أمل: جرى إيه ياراجل هو أنت قاعدلي ع الوحدة

- أبو أمل: ربنا يهديكى ماتخلينا ف حالنا، مالنا ومال الناس.

- أم أمل: تخرج ع السلم، أشخاص مسندين أبو مينا، مالك ياخويا وتخبط ع أم مينا، افتحي ياخشتي إلحقى جوزك مطالعينه مسندينه
- أم مينا: يالهووووى ... مالك يابو مينا إيه اللي جرا لك ياخويا
- أم أمل: ياخشتي روجي اعمليله كباية ميه بسكر
- الناس نازلين ألف سلامة عليك يابو مينا .
- أم أمل: هو أنت إيه اللي منزلك الشغل بدري كدة
- أم مينا: شغل إيه ياخشتي، يأم دة طلع معاش بقاله تلت شهور
- أم أمل: ياخشتي والنبي ماعرف..... طيب أمال كان نازل رايح فين ماتتت
- أم مينا: ياخشتي دة عيان وكان رايح التأمين الصحي .. أهوع الحال ده كل كام يوم يلف اللفة دي
- أم أمل: وهو ياخشتي التأمين الصحي بينزلزلوا بدري كدة خدي بالك يأم مينا الرجالة لما بتكبر بتتهبل أنا قلتلك خدي بالك وخلص عشان ماترجعيش تتدمي ودورى بقى ع ميتك تسخن

- أم مينا: يعنى هيروح فين يأم أمل هو ف نفس يمشي.
- أم أمل: مهودة يا حبيتي اللي يتخاف منه أهو يدور ع واحدة صغيرة يقول أرجع شبابي
- أبو مينا: هاتيلي بوق مية يأم مينا
- أم أمل: أوعي ياختشي يغرك كهن الرجالة والتمثيل بتاعهم
- أم مينا: تنتظر بشك وتكشر عن أنيابها
- أم أمل: طب هو ياختشي لما خرج م الخدمة خد كام بالظبط
طبعاً ماقلكيش
- أم مينا: لاء ما عرفش يأم أمل
- أم أمل: ولا هيقولك ياختشى، قال يا مأمنة للرجال يا مأمنة
للمية ف الغربال
- أبو مينا: بق فيه يأم مينا
- أم مينا: تقوم وتروح لأبو مينا كت رايح فين ي أبو مينا
- أبو مينا: يعنى هروح فين يأم مينا
- أم مينا: أه مهى مش حجة التأمين الصحي كل يوم والتاني
رايح جاي

- أبو مينا: ياولية بقولك هاتي بق مية
- أم مينا: ميه إيه وبتاع إيه صحيح أنت بتتاخر للساعة أربعة وخمسة وتقولي تامين وكلام فاضي وأنا اللي مصدقك وفاكراك عيان بعد علو الصوت ودخول أبومينا ف أزمة يدخل أبو أمل
- أبو أمل: إيه يا جماعة ماتصلوا ع النبي عملتى إيه يا حشرية
- أم أمل: والنبي ياخويا ما عملت حاجة
- أبو أمل: إزاي ياولية ده الراجل هيروح فيها
- أم أمل: يروح فين ياخويا وأنا مالي ده واحد ومراته أنا إيه دخلني
- أم مينا: لاء منا لازم أعرف بيروح فين
- أم أمل: ياخشى يأم مينا بالراحة ع الراجل ليروح فيها بصحيح أنا داخله أحضر الفطار فاكرة يأم مينا لما كتى بتصومي زمان معايا لما كان أبو أمل اسم النبي حارسة وصاينه مسافر والنبي أيام ماتتعوض يلااااا أيام
- أم مينا: ياختى إنتي راخرة يأم أمل أنا ف إيه ولا ف إيه استنتي ياختى أما اشوف الراجل ده كان فين ده أيامه مش فايته معايا

الحلقة الثانية عشر

ع التت وسننه

الشخصيات:

أم أمل

أبو أمل

حنان

عاتيف

أم أمل: ع السلم تلتقى بجارتها حنان شابة صغيرة متزوجة
من فترة قصيرة

- أم أمل: صباح الخير يا حبيبتي

- حنان: صباح النور يا خالتي

- أم أمل: مالك يا حبيبتي

- حنان: ماليش يا خالتي

- أم أمل: لاء يا حبيبتي دة إنتي شكلك زعلان أووى هغدي اسم

النبي حارسه وصاينه عمك أبو أمل وأطلعلك أشرب معاكي

الشاي

- حنان: ماتتعبيش نفسك ياخالتيشي
- أم أمل: لاء ياحببتي دة إنتي زي أمل والنبي اغديهم بس
وأطلعلك
- حنان: تنوري ياخالتيشي
- أبو أمل: بعد الغدا ... عملتي الشاي ياولية
- أم أمل: ابقى خلى البت أمل تعملك كباية الشاي أنا طالعة
لجارتنا اللي فوقينا البت حنان
- أبو أمل: استر ياستار
- أم أمل: مالك ياراجل
- أبو أمل: مالك ومال البت الغلبانة دي كمان
- أم أمل: ياخويا ده أنا شيفهاها طالعة والدمعة هتفر من عينيها
- أبو أمل: ياولية سيبي البت ف حالها مالك ومال الناس
- أم أمل: مالي إزاي ياراجل دة النفس ع النفس رحمة
- أبو أمل: روعي ياشيخة كتتم نفسك
- أم أمل: بتقول حاجة ياخويا
- أبو أمل: لاء ده أنا بقول كلك واجب

- أم أمل: أيوة ياخويا ده الناس لبعضيها
- أم أمل بتخبط ع جارتها حنان ... يفتح الباب جوز حنان الواد العايق
- عمرو: اتفضلى يا حاجة
- أم أمل: حاااجة ... حاجة ف عينك والنبي لو ماعيب كت أقولك الحاجة دي تبقى مين عمي ف عينك
- حنان: تدخل بكبايتين الشاي يامرهب ياخالتشي
- أم أمل: مالك ياختشى وشك ممؤت ومصفر وخسة كدة وشكلك زى العيانة
- حنان: والنبي ياخالتشي محدش خالي م الهم
- أم أمل: فضفضي ياختشي أنا زي أمك
- حنان: هقولك إيه ياخالتشي والنبي أنا مكسوفة
- أم أمل: ليه ياختشي معذورة ف فلوس؟
- حنان: لاء ياخالتشي فلوس إية
- أم أمل: إمال مالك ياختشى احكيلى أنا زي أختك الكبيرة
- حنان: عمر ياخالتشى

- أم أمل: ماله ياختشى
- حنان: تبكي بيعرف واحدة عليا وبيكلمها ف التليفون
- أم أمل: وأنتى عرفتى إزاي يا حبيبتي
- حنان: سمعته يا خالتشى ومتفق معاها ع الجواز
- أم أمل: ودي عرفها منين ياختشى أكيد زميلته ف الشغل
- حنان: لاء يا خالتشى ده يعرفها من ع انت
- أم أمل: وأنتى عرفتى إزاي؟
- حنان: دخل الحمام وساب الكمبيوتر لقيته حاطت صورة
كاظم الساهر ومتفق معاها ع الجواز
- أم أمل: هاهنا أسود هي حصلت كاظم لاء ده إنتي ماتسكتيش
- حنان: مآنا خايفة يا خالتشى أخرب بيتي بايدي.
- دخل عمر: أهلا بيكي يا خالتشى أم أمل نورتيانا .
- أم أمل: ده نورك يا حبيبي إلا قولى ياسى عمر هو أنت ياخويا
مراتك مش مالية عينك؟
- عمر: كلام إيه ده يا خالتشى
- حنان: إيه يا خالتشى

- أم أمل: اسكتي بدال عرفتي بيقى لازم تقويله
- عمر: تقولي إيه يا وليه إنتي وأنتي أصلا إيه دخلك؟!
- أم أمل: مش عيب عليك تعرف واحدة ع الاسم إيه ده وتقل
حياك مش تحترم نفسك خلي ربنا يكرمك ف عيشتك
- حنان: اسكتي والنبي يا خالتي
- تدور خناقة بين عمر وحنان
- عمرو: لمي هدومك يلا وع بيت أبوكى
- حنان: يا عمر
- عمر: يلا إنتي مالتيش عيشة معايا تاني
- أم أمل: أنا نازلة ياخويا أنا ماليش ف خراب البيوت حلوا
مشاكلكوا مع بعضيكوا استهدوا بالله أنا نازلة
فتكوا بعافية



إية اللي دهوله كدة وبقى شكله لايسر عدو ولا حبيب أنت
ياواد ياقليل الأدب احنا ف المذاكرة ولا ف أبوك

- حماسة: ياما طيب سيبيني أذاكر

- أم أمل: يعنى هي مذاكرة الإنجليزي ماتتذاكرش إلا والكتاب
بالمقلوب؟

- حماسة: يوووووو محسسانى إنك كتي مدرسة إنجليزي

- أم أمل: يعنى هما مدرسين الإنجليزي أحسن منى ف إيه

- حماسة: طب ماتيجى تذاكرلى ياما؟

- أم أمل: وماله أذاكرلك هات الكتاب والشبشب وتعالى

- حماسة: إنتي هتضربيني بالشبشب ياما؟

- أم أمل: لاء ياواد دي احتياطات أمنية بس

- حماسة: استر يارب شكلك عاوزه تسقطيني

- أم أمل: أسقطك إيه يامنيل اسم الله أنت فالح أووي

- حماسة: ياما ابعدى عني.

- أم أمل: ابدا والنبي لأذاكرلك

- حماسة: يالهووووووي يادى اليوم اللي مش معدي

- أم أمل: بتقول إيه ياواد ياللي تتشك
- حماسة: مابقولش ياما مابقوووولش
- أم أمل: آه بحسب تعالي يا حبيبي
- حماسة: يقلب ف الكتب اللي قدامة ويحطها تاني لفترة
- أم أمل: ماتخلص ياواد يابارد
- حماسة: حاضر ياما حاااضر يجيب الكتاب ويمشي ببطء
- أم أمل: هات البوك ده وسدون جنبى هير تعرف تسبل كلمة بوك
- حماسة: ياما اااا
- أم أمل: ياما ف عينك حد يكلم مازروا كدة إخس عليك واد درتي
- حماسة: اكيس هندك سيبيني ف حالي
- أم أمل: أنت بتشتم يا قليل التربية
- حماسة: ياما بقولك أبوس إيدك سيبيني ف حالي
- أم أمل: آه يبقى مش عارف تسبل الكلمة ياموكوس أمال بتقعد ف الكلاس زيك زي الدسك اللي قاعد عليه والمسترات اللي بيدخلوك زي قلتهم ... يا خسارت شقه فازرك عليك يامنيل

- حماسة: يضحك بصوت عالي ويستفزها اكثر
- أم أمل: إخس عليك وع تربيتك بقى إحنا مدخلينك مدرسة تجريبي، وأنت تطلع دونكي الدنكنة دي كلها طب ده أنا لما لاقيتك كاتب اسمك ع انت هماسة فرحت وقلت ابني بقى مصافجك وكسة من دون العيال وتحاول تجرى وراه بالشبشب
- يخرج أبو أمل: إيه يا وليه الهيصة اللي إنتي عملاها دي
- حماسة: الحق يابا دي عاوزة تذاكرلي انجليزي
- أبو أمل: يضحك هو وحماسة وهي تنظر نظرات استغراب
- أم أمل: والنبي بتضحكوا ع إيه مهو طالع موكوس زيك
- أبو أمل: يا ولية مالك بالواد إنتي بتعريف إنجليزي ولا عربي حتى سيبي الواد ف حاله
- أم أمل: جرى إيه ياراجل بدل ماتقول كتر خيرك ع طول كاسر شوكتي طب ده أنا كت بطلع الألفة لولا حظي المنيل اللي وقعني فيك
- أبو أمل: حظك إنتي ولا حظي أنا
- أم أمل: بتقول إيه ياراجل

- أبو أمل: مابقولش بستغفر ربنا فيها حاجة دي
- أم أمل: أنا اللي غلطانة قطيعة تقطعك أنت وأولادك ومذاكرتهم ومدارسهم ع المدرسين اللي همهم لم الفلوس والنبي لجوه من هنا وأسيبك البيت مطربق عليك أنت وهما تتذكر إن بيت أهلها مافهوش نت ففتراجع بس يخلصوا امتحانات الترم ع خير.

يلاااافتكوا بعافية



الحلقة الرابعة عشر

ماتش كورة

الشخصيات:

أم أمل

أبو أمل

حماسة

اللول

أمل

أم أمل: إيه ياولاد الهيصة اللي ف الشارع دى هى الحرب
قامت ولا إيه

- أمل: يامادة ماتش الأهلى والزمالك النهاردة بس تعالى بصي
القهوة اللي تحتينا اتكسرت ويحذفوا الكراسي ف الشارع

- أم أمل: وهما عشان الماتش يضربوا ف بعض دة إيه الوكسة
دي، يتيلوا يشوفوا لهم شغلانة تنفعهم بدل قاعدة القهاوي

- أمل: ياما بقولك ده الأهلى والزمالك

- أم أمل: أمال لو كانت مصر كانوا عملوا إيه

- أمل: ياما مهو الاتتين مصر بردوا
- أم أمل: يلا ربنا يهديهم
- الباب يخبط ويدخل اللول ساند حماسة متعور ودمه سايح
- أم أمل: مالك ياواد إيه اللي جراه ياواد يالول
- اللول: مفيش ياخالتيشي دة إحنا كنا ع القهوة بنتفرج ع الماتش
وحماسة قعد يشتم ف اللعيبة واحد خبطوا بكرسي ف
نفوخوا
- أم أمل: وأنت مالك ياموكوس قاعد بتتيل تتفرج بتشتتم ليه
لازم لسانك الطويل ماتخليك متحرم وماتغلطش ف حد
- حماسة: ياما والله الاهلى كان بيلاعب ذى الفل بس الزمالك
كعبهم عالي ماعرفش ربنا نفخ ف صورتهم ماعرفش إية اللي
حصل
- أم أمل: ياواد ياموكوس أنت فاكر الإهم لما بيغلبوا بعض
بيعملوا ف بعض كدة دول أصحاب وبيطلعوا م الماتش يضحكوا
ويهزروا والمواكيس اللي ذيك هما اللي بياكلوا ف بعض
- اللول: والله ياخالتيشي قتلته مالناش دعوة
- أم أمل: وأنت يامنيل ع عينك بتشجع مين فيهم

- اللول: أنا ماليش ف الكورة خالص ياخالتي
- أم أمل: أمال إيه اللي موديك القهوة يامنيل
- اللول: كت رايح مع حماصة ياخالتي
- أم أمل: واكسة عليك وع حماصة ف ساعة واحدة أمال اسم النبي حارسة وصاينة أبوك فين
- حماصة: أنا عارف ياما كت شايفة مع عم سماعين قبل الماتش ماشيين ف الشارع
- أم أمل: مالك يابت يالى تنضرب يأمل واقفة كدة ليه روحى هاتى لاخوكى حاجة يشربها وأنت ياواد ياولول يلا طرفنا
- اللول: امشي ياخالتي
- أم أمل: أمال أنت جاي تبات عندنا
- الباب يخبط ويدخل أبو أمل بهدومه مقطعة ...
- أم أمل: مالك ياراجل مين اللي عمل فيك كدة
- حماصة: يقوم وهو مش قادر يقف مين اللي إتجرأ ومد إيداه عليك
- أم أمل: ياخويا اتوكس كت اشطرع اللي ضربوك

الحلقة الخامسة عشر

عيد الحب

الشخصيات:

أم أمل

أبو أمل

أمل

حماسة

- أم أمل قائمة ع صوت أمل بتزعق ف التليفون
- أم أمل: مالك يابت صوتك على اسطبخنا واصتبح الملك لله
 - أمل: مافيش ياما
 - أم أمل: يابت ف إية دة إنتي صوتك مسمع الشارع كله
 - أمل: يووووو سبيني ف حالي ياما
 - أم أمل: يابت مالك بتزعقى ليه وجعتي قلبي
 - أم أمل: ياما زكريا بقوله ع هدية عيد الحب البخيل الجلدة

- حماصة: عيد الحب بكرة ياما والبت بتاعتي مش هتقدر
تخرج بكرة قلت أقبالها النهاردة
- أم أمل: هو ف إيه كل الناس هتحتفل بعيد اسمه إيه ده الحب
إلا أنا
- تدخل أم أمل ع أبو أمل تدلع
- أم أمل: أعملك كباية شاي ياخويا
- أبو أمل: مالشاي جنبي أهو لسه عامله
- أم أمل: طب أجبلك لقمة تاكلها يا أبو أمل
- أبو أمل: إيه الأدب اللي نزل عليكى دة ياولية
- أم أمل: يووووة ف إيه ياراجل هو أنت ولا عجبك كدة ولا
عجبك كدة
- أبو أمل: هو إنتي عاوزه حاجة يأم أمل
- أم أمل: هو أنا ليا إلا أنت يا حبيبي
- أبو أمل: أستريارب
- أم أمل: مالك ياراجل متاخذ كدة ليه هو عيب الواحدة تدلع
جوزها

- أبو أمل: أنا قلت إن في مصيبة مستتياني
- أم أمل: بقولك إيه ياخويا النهاردة عيد الحب
- أبو أمل: يضحك كثيراً
- أم أمل: بتضحك على إيه ياراجل أنا قلت نكتة
- أبو أمل: دي نكتة صحيح لاء وجديدة كمان
- أم أمل: ده أنت إيامك مش معدية اشمعني أنا ياراجل
- أبو أمل: ياولية احنا كبرنا ع الكلام ده إنتي باين عليكي
تهبليتي
- أم أمل: أنت ياخويا اللي كبرت لوحذك أنا عاوزه هدية هو
أنا عجبه
- أبو أمل: وليه مجنونة ومخك طق صحيح
- أم أمل: بتقول حاجة ياخويا
- أبو أمل: لاء ده أنا بقول استغفر الله العظيم
- أم أمل: أمنت بالله حس على دمك ياراجل
- أبو أمل: ياولية أسيبلك البيت وأغور ف داهية
- أم أمل: يا ما أنا عاوزه فلوس اشترى هدية لزكريا

- أم أمل: ينيلك إنتي يابت مش كتى بتتخانقي مع الموكوس
زكريا عشان يخيلك هدية.
- أم: أيوة ياما مهو يجييلي هدية وأنا كمان لازم أجيله هدية
- أم أمل: هو إيه ياختى ده يبقى عملنا إيه ماكل واحد يوفر
ماله على حاله
- أم: ياما مهو كدة كل الناس بتعمل كدة
- أم أمل: أمال ياللي تتضربي خلتيني أمسك في خناق أبوكي
ليه، حقك عليه يابو أمل أنا غلطانة ياخويا إنى بمشي ورا
العيال



الحلقة السادسة عشر

بنطلون زكريا

الشخصيات:

أم أمل

أبو أمل

أمل

زكريا

أم أمل تلتقي بأمل ف الصلاة صباح الخير ياما

- أم أمل: صباح الخير يا حبيبتى اجري حطي الشاي وصحي
اسم النبي حارسه وصاينه أبوكي

- أم: حاضر ياما ... بقولك ياما

- أم أمل: خير ع الصبح

- أم: ياما زكريا جاي يتغدى معنا النهاردة

- أم أمل: ليه يعنى النهاردة مش الجمعة

- أم: ياما إنتي ناسية

- أم أمل: ناسية إيه يا حيلة أمك
- أم: ياما النهاردة عيد الحب وزكريا جاي وجاييلي الهدية
- أم أمل: قطيعة ماتفكرنيش كفاية الكلام اللي سمعتوا لأبوكي
إمبارح، ده كان يوم منيل، الله لا يعيدو
- أم: يالهووى ياما إنتي بتحبي تعملي م الحبة أوبة
- أم أمل: ياختشي بلا أوبة ولا هوبا أنتوا اللي عيال سو،
ماجنيش من وراكوا غير النكد يلا ااا وإن شاء الله اسم الله
عليه الموكوس بتاعك جاي هو والولية الناقصة أمه، ولا جاي
لوحدوا؟
- أم: والنبي ياما مسألته وأمه هتيجي تعمل إيه؟
- أم أمل: أيوة مهى حاشرة نفسها ف الكبيرة والصغيرة .
- أم: لاء ياما مش يومها خالص
- أم أمل: أخش ياختشى أشوف أبوكي أحسن مقموص من
إمبارح.
- باب الشقة يدق
- أم أمل: شوي في مين يابت يا أمل

- أمل: حاضر

- الجرس يدق مرة أخرى

- أم أمل: يا بت شو في مين بن المسروعة اللي مش صابر

- أمل: تفتح الباب ...

- أمل: ده زكريا ياما

- زكريا: إزيك يا حماتي

- أم أمل: أهلاً تاني مرة ياخويا لما تخبط شيل إيدك من ع

الجرس أحسن يتحرق حرقة تحرق دمك أنت وأمك

- زكريا: بتقولي حاجة أحماااتي

- أم أمل: بقولك إزي أمك

- زكريا: الحمد لله يا حماتي

- أم أمل: خارجة من الأوضة جتك حمى تتفاجئ بيه حالق

شعره حلاقة غريبة

- أم أمل: إيه اللي عامله فى راسك ده يازكريا

- زكريا: الموضة بتاعة عيد الحب

- أم أمل: هاهنا أسود حتى العيد ده عاملوله حلاقة ينيلكوا

- أم أمل: تصدق اللي أنت راجل ما عندكش دم مانتش شايف
راس الواد عاملة إزاي ولا بنطلونه اللي مد شوية وهو ماشي
هيقع منه من غير ما يحس .
- أبو أمل: يا أولية شباب فرحان بنفسه
- أم أمل: أحبييه عليك راجل بدل ماتقولوا استرجل أمال
هتديله البت إزاي.
- أبو أمل: هو عاجبها وهى عجباها وإحنا هنعيش معاهم
- أم أمل: وأنت إيه ياخويا كيس جوافة
- أبو أمل: يا أولية حسنى ملافظك إنتي ع طول بتحدفي طوب
- أم أمل: طوب إيه يا راجل والنبي عمري لا شوفت ولا هشوف،
أمك شافت وأنت كدة يا زكريا .
- زكريا: أه شففتي
- أم أمل: يا فرحة أمك بيك يارتها كانت اتبطت عليك
- زكريا: ماشي غضبان وبمشي بسرعة البنطلون ينزل
- أم أمل: تضحك يا ختشي مش قلتلك اربطوا بدبارة ياواد
لينشلوك

- أمل غضبانة: ياما إنتي عاوزة تخريبها
 - أم أمل: ياخشى ياريت
 - أبو أمل: ياولية نكدتي ع العيال مالك بيهم إنتي لسانك متبري منك لا حول ولا قوة الا بالله.
 - أم أمل: يعني بردوا أنا غلطانة ع طول كاسر شوكتي خليهم يولعوا هو وهي أنا اللي أستاهل بقى والنبي ده منظر ولا ده شكل بني آدم ده عامل زي العيال الممزقة بقى هما دول شباب البيجي ميحي اللي بيقولوا عليه أنا مالي خليني ف حالي
- يلااااا فتكوا بعافية



الحلقة السابعة عشر

نزلة برد

الشخصيات:

أم أمل

أبو أمل

حماسة

أمل

أم أحمد

أم أمل صاحبة تعبانة رابطة راسها بإيشارب وماشية ف
وسط البيت

- أم أمل: أه ياني تعبانة إلقوني ياولاد مش قادرة أدوس ع
رجلي

- أمل: مالك ياما تعالي ريحي ف السرير

- أمل بتاخذ أمها تميمها ف السرير

- أم أمل: هو اسم النبي حارسة وصاينه أبوكي راح فين

- أمل: نزل ع القهوة ياما
- أم أمل: أه مهو دة اللي فالح فى ييجى يشوفلي دكتور
- أمل: حاضر ياما هكلموا ع المحمول
- أم أمل: أيوة ياختشي كلميه
- حماسة: مالك ياما أنا كت بكلمه عشان عاوز فلوس الدرس التليفون بتاعه مقفول
- أم أمل: تتعدل مقفول دة يوموا مش معدي إيه اللي قافلة ياترى بيتسرمح فين أه ياني بس أقوم ع رجلي وأنا هوريله
- أمل: ياما إنتي ف إيه ولا ف إيه استتي أجيبلك اسبرينه
- أم أمل: اسبرينه ده إيه دة أنا عاوزة دكتووووور تعبانة ياولاد شوفيلى أبوكي رني عليه تاني قوليله أمي تعبانة
- أمل: ياما رنيت عليه لقيته مغلق
- أم أمل: اه ياناري اللي ينولهولي دلوقتي كت أكل مصارينه
- حماسة: يعني فيكي نفس تتخانقي دلوقتي
- أم أمل: تترمي ع السرير لاء تعبانة والنبي تعبانة

- يدخل أبو أمل وهو بيغني مادام تحب بتتكرليه .. ده اللي يحب بيان ف عينيه تقوم أم أمل ترقص وتعيد الأغنية
- أم أمل: جاي رايق وبتغني وأنا تعبانة ومرمية أنا عاوزة دكتور
- أبو أمل: مالك ياولية مانا سايبك زي الجن إيه اللي جراك
- أم أمل: قافل تليفونك ليه ياراجل
- أبو أمل: ماقلتوش ياولية ده الشحن خلص
- أم أمل: خدي يابت يا أمل رنيتي على أبوكي كام مرة
- أم أمل: أيوة يابا كل مارن عليك يديني مغلق
- أم أمل: أهوووو مغلوق مش الشحن خلص
- أبو أمل: يعني عاوزة يقولك الشحن خلص مهو لازم يقول مغلق
- أم أمل: هaaaa أسود وكمان بتعترف ياراجل ياللي ما عندكش دم
- أبو أمل: أعوذ بالله من لسانك
- حماسة: أنا عاوز فلوس الدرس عشان أنزل
- أبو أمل: يابني استنى إما نشوف البلوة دي

- أم أمل: بتقول إيه يارا الاجل
- أبو أمل: مابقولش لا إله الا الله
- أم أمل: إما بتحب وتتكبر ليه مين اللي كان داخل يغني ياراجل
ياهزق
- أبو أمل: ياولية إنتي هتحرميني انتفس
- أم أمل: ياخويا أنتفس جتك كتم نفسك
- أبو أمل: هو إنتي بتقولي إيه ياولية
- أم أمل: بقول تعبانة ياخويا عاوزة دكتور
- حماسة: أنا عاوز الفلوس خلونى انزل
- أبو أمل: يابني اهدي اللي ينتقم منك أنت وأمك
- حماسة: علشان لما أسقط محدش يبقى يفتح بقه معايا
- أم أمل: لاء اسم الله فالح أوووى
- حماسة: يووووه والله مآنا رايح لكوا دروس
- أم أمل: ياولاد مش قادرة أبلع ريقى ولا عارفة أخذ نفسي
- أبو أمل: روح يابني خد عشة جنية هاتلها شريط مضاد
حيوي وشريط مسكن

- أم أمل: هاتوا أي حاجة دماغي هتتفجر مش قادرة ياولاد
- أبو أمل: أما نشوف آخرة الدلع ده إيه
- أم أمل: إلهي ربنا يبتيك بالدلع اللي أنا فيه
- ينزل حماسة وييجى بزعيقه
- حماسة: أنتوا غاويين تكسفونا مع الناس أروح الأجزاخانة
يقولي شريط المضاد أدي للراجل العشة جنية يبصلي ويضحك
ويقولي شريط المضاد بتمنتاشر جنية وشرط المسكن لوحدة
بتمانية
- أم أمل: تتعدل وتقوم ليه أذفع ستة وعشرين جنية ومن غير
ماروح لدكتور هو كمان الدوي بيغلوه ع الناس الغلابة خلاص
بقى اللي يعيي يموت هنلاقيها منين ولا منين أجرى يابت
يا أمل أعمليلي كباية شاي وحطيلي عليها نص لمونة قطيعة
تقطع العيي ع الدواع اللي غلوه يلا أقوم أتمشي شوية ف
الشقة أفك رجلي يمكن أفوق الرقدة هتتعبني أكثر
يلاااااا فتكوا بعافية



الحلقة الثامنة عشر

ابرز تنجز

الشخصيات:

أم أمل

أبو أمل

حماسة

موظف البطايق

الساعي

أم أمل بتعيط وتتدب حظها

- أم أمل: يا عيني عليه وع بختي هو أنا كت عملت إيه علشان يتعمل فيه كده

- أبو أمل: مالك يا أولية بتدبي ليه ع الصبح هو إنتي لو مالقتيش حد تتكدي عليه تتكدي ع نفسك

- أم أمل: سبني ف حالي ياراجل أنت أنا أصلاً مش طايقة نفسي

- أبو أمل: خير عملتي مصيبة إيه النهاردة

- أم أمل: أنا ياخويا ماعملتش حاجة ده أنا اتقلبت ف السوق
- أبو أمل: مين ياولية اللي قلبك
- أم أمل: أنا ياخويا رايحة السوق ف امان الله ولقيت عيلين بيتخانقوا حجزت بينهم ويدوب دخلت السوق أدورع الكيس مالقتوش وأبص ع العيال فص ملح وداب
- أبو أمل: يعنى راح مصروف البيت
- أم أمل: ياريت ياخويا ع مصروف البيت وبس دي بطاقة التموين كت ف قلب البوك
- أبو أمل: يانهارك مش معدي ازاي دوري بقى شوي في مين هيروح يعملها دي وخه ماحصلتش
- أم أمل: هو أنت ياراجل هتسبني أروح أنا اللي أعملها
- أبو أمل: هو إنتي ياولية تعملي العملة وعاوزاني ألف وأدورع اللي يعملني البطاقة إنتي جرى لك حاجة ف مخك ولا إيه
- أم أمل: ف إيه ياراجل أنت شمتان فيه
- أبو أمل: أنا ولا شمتان ولا غيره حليها مع نفسك
- أم أمل: يايعيني عليه وع بختي المنيل اللي مالاقيه حد ناصفني

- حماسة: ياما هو إنتي عاوزة تعملي المصيبة وبعدين تعيطي
- أم أمل: احس عليك وع تربيتك واد قليل الأدب
- حماسة: يوووووة انزلي دوري ع العيال ياما
- أبو أمل: يابني اسكت وأبعد عنها هي عاوزة ترازني فينا إحنا بس وليه عديمة التمييز.
- أم أمل: سمعاك ياراجل وبتتكلم لجوة ليه
- أبو أمل: يولية أنا قلت حاجة إنتي مش لاقية حد تتخانقي معاه
- أم أمل: وأتخانق ليه هي دي آخرة خدمتي فيك أنت وعيالك
- أم أمل أمام الموظف.
- أم أمل: ياخويا بقولك البطاقة راحت ف البوك أصلي كت ماشية ف الشارع والعيال كانوا بيتخانقوا بخلصهم من بعض اما قلبوني عيال قللات أدب
- الموظف: ياستي إنتي هتحكيلي قصة حياتك
- أم أمل: ياخويا مالك خلقك ضيق كدة ده أنا بفضفض معاك
- الموظف: ياستي أنا مش فاضي روحي خلصي بقية الورق وتعالى

- أم أمل: مهى ياخويا شهادات الميلاد والورق كله معاك
- الموظف: ياستي بقولك ورقك ناقص
- أم أمل: أصلي ياخويا أتخانقت أنا وأبو أمل ومارديش بييجي يخلصها قال يعني بيعاقبني مع إنه ياخويا قاعد متلصح ف البيت
- الموظف: ياستي أنا مالي بأبو أمل ولا أم أمل
- أم أمل: مالك إزاي ياخويا مانت لازم تخلصلي البطاقة ده، أنا مانعرفش نجيب حتى العيش إلا بيها.
- الموظف: ياستي خلصي ورقك وتعالى
- أم أمل: خارجة تكلم نفسها روح منك لله، ده أنت راجل ما عندكش نظر، شايف واحدة ست قدامك والورق ناقص ...لأء إلا مضي ما عرفش مالها اشى روحى صوري إيه ... وف الآخر قال مش مستوي في إلهي يجيك ويحط عليك يادي الراجل وأنت يأبو أمل حسبى الله ونعم الوكيل فيك اللي حوجتني للى يسوى واللى مايسواش يقابلها الساعي يحمل بعض أكواب شاي ومية
- الساعي: مالك ياست

- أم أمل: وأنت مالك أنت بكلم نفسي أنا حرة
- الساعي: حقا عليه أنا كت عاوز أساعدك
- أم أمل: خد ياخويا تقدر تخلصني الورق
- الساعي: هاتي ياستي أنا هخش لعبد الله أفندي
- أم أمل: قطيعة مانا كت عنده ياخويا
- الساعي: ياستي هاتي الورق واركني هنا شوية
- أم أمل: اركن ياخويا وماله بس خلصني يدخل الساعي ويخرج
مخلص الورق
- الساعي: خدي يا حاجة أى خدمة
- أم أمل: تسلم ياخويا والنبي أنت سرك باتع ده أنا بقالي
ساعتين واقفة قدامه لحد ماريتي نشف
- الساعي: كتي جتيلي ع طول وأنا أخلصهولك
- أم أمل: الله يباركلك ياخويا ماكانوا بيقولوا مابقاش ف
وسايطولا محسوبيات هما رجعوا ف كلامهم ولا إيه
- الساعي: بقولك إيه ياستي هاتي الشاي بتاعي واتكلي ع الله
يا حاجة مش عاوزين شوشرة

- أم أمل: شاي إيه ياخويا أنا خدت منك الشاي بتاعك عشان تقولى هاتي الشاي مانت داخل والصينية كت ف إيدك
- الساعي: بقولك إيه ياولية إنتي أنا عاوز عرقي
- أم أمل: عرق إيه ياخويا أنا كت لفتك التراك
- الساعي: إنتي باين عليكي وليه لبط
- أم أمل: لاء ده أنت اللي باين عليك راجل قليل الأدب
- الساعي: ياستي أنا مش خلصتك الورق
- أم أمل: امال أنت كت عاوزني أجي وأمشي من غير ما أخلصه وأرجع البيت أتخانق مع اسم النبي حارسه وصاينه أبو أمل
- الساعي: لا حول ولا قوة الا بالله العلي العظيم
- أم أمل: بصوت عالي جرى إيه ياخويا ورقة ومضتها وأنت اللي عرضت عليه خارج بقااا عايز الشاي عاوز عرقي هو إيه مابقاش ف ضمير
- الساعي: ياستي وطى صوتك إنتي هتفضحيني أنا اللي أستاهل اتكلي ع الله من هنا.

- أم أمل: أمال واكل دماغى م الصبح ليه جتك الهم راجل عرة
عالم تخاف ماتختشيش آه لو أشوف العيال اللي قلبوني
 - وخلوا اللي يسوى واللي ميسواش يتحكم فيا صحيح ماينوب
المخلص إلا تقطيع هدومه
- يلااااااااااا فتكوا بعافية



الحلقة التاسعة عشر

عزومة حماتي

الشخصيات:

أم أمل

أبو أمل

حماتي

أخت جوزي

أمي

- أبو أمل: بقولك إيه يأم أمل اعلمي حسابك إمي جاية تفطر معانا النهاردة
- أم أمل: طب وليه النكد ده ع الصبح أمك ده إيه
- أبو أمل: بتقولي حاجة يأم أمل
- أم أمل: لاء ياخويا دة أنا بقول وماله تيجي ياخويا وأختك جوزها جه خدها ولا لسة قاعدة عند أمك ؟
- أبو أمل: يعنى هى أختى والعيلين هيعملوا إيه

- أم أمل: ياخويا ولاد أختك دول معجونين ف مية عفاريت ببيجوا يقلبوا الدنيا وأنا مافيش حيل أنظف وراهم
- أبو أمل: معلش يأم أمل عدي اليوم النهاردة وخلص
- أم أمل: طيب أما أكلم أمي تيجي بالمرة هي وأخويا ومراته أصلها حامل ومش معقول أمي هتسبها وتيجى مانت عارف دول عايشين مع بعض كلهم وهي اللي خادمة أمي
- أبو أمل: ياوليه هو ده وقته بقولك نعزم أمي تقوليلى وأمي وأخويا
- أم أمل: بالمرة ياخويا ونبقى خلصنا م العزومتين بلا هذه حيل بدل ما نعزم كل واحد لوحدة
- حضرت والدة أم أمل ووالدة أبو أمل وأخت أبو أمل وطفلين ومرات أخو أم أمل ومعها ولد شيطان وأخو أم أمل.
- أبو أمل: ماتيجي يا حسن ألبك عشرين طاولة
- حسن: يلاع ما يخلصوا الفطار
- أم أمل: اقعد يا حبيبي بطل شقاوة العيال ضرب ف بعض وخناق وصوت عالي أخت جوزها لمرات أخوها
- أخت جوزها: ماتلمي ابنك ياختشي الواد ماله معضرت كدة ليه

- مرات اخوها: مالك ياختي بالواد الله وأكبر عليه
- أخت جوزها: ياخشى أنا هحسدوا الله وأكبرع إيه ده واد
قليل الأدب
- أم أمل: لاء ياخشى دة حتة الواد اللي حيلتها مالهوش لازمة
الغلط
- أخت جوزها: ياخشى أنا قلت حاجة أنا بقول الواد شقي
- أم أمل: وأنتى ياخشى اللي ولادك اسم الله عليهم زي النسمة
- حماتها: مالكوا إنتى وهى طلعتوا ف البيت كدة ليه
- والدة أم أمل: ف إيه ياوولاد دول عيال مع بعض
- امرات اخوها: ياحماتي أنا ماتكلمتش
- أم أمل: أيوة ياما مرات أخويا ماتكلمتش هي اللي غلطت
وشتمت ف الواد
- حماتها: ياخشى اهدي إنتى شوية مالك حامية كدة ليه
ومسخناها
- أم أمل: إيه ياحماتي اللي بتقوليه ده هسخن إيه وإبرد إيه أنا
بقول كلمة

- الحق مهو مايصحش تقول ع الواد قليل الأدب
- حماتها: وفيها إيه يعني هي غلطت ف مين ده حت عيل
- أم أمل: وتغلط فيه ليه ده عيل محترم متربي بين أمه وأبوه
مش أبوه راميه وبتربيه واحدة ست
- أخت جوزها: قصدك إيه يأم أمل
- أم أمل: ولا قصد ولا غيره
- والدة أم أمل: ياولاد مش كدة استهدوا بالله
- أم أمل: ياما اسكتي مرات أخويا ماحيلتهاش غيره ليها حق
تزعل
- مرات اخوها: خلاص أنا مش زعلانة
- أم أمل: تغمزها لاء ياختشي وإن زعلتي حقك ده ابنك بردوا
- أخت جوزها يلا ياواد أنت وهي خلينا نمشي من هنا
- أبو أمل: عيب كده ياختشي ده المغرب خلاص هيدن
- أخت أبو أمل: أبداً والنبي ما قعد أنا ماشية
- أبو أمل: ياولية إمسكي فيها
- أم أمل: ياخويا أنا كلمتها هي اللي جاية تقول ياشر اشتر

- أم أمل: مالك ياختشي بتكلمي أخويا كدة ليه عيب عليك
- أخت جوزها: جرى إيه يأم أمل إيبه هو إنتي هتاخدنا بالدور ولا إيه
- أم أمل: جرى إيه ياخويا أنت ساييها تتكلم معاك وتعلي صوتها عليك
- أخو أم أمل: وطى صوتك ياولية إحنا ف بيوت ناس
- أم أمل: هي ياخويا كانت احترمت بيوت ناس ولا غيره دي صوتها أعلى من صوتك.
- مرات أخوها: يلا ياواد أنا هروح أفطر ف بيتنا
- أخو أم أمل: والنبي مانا قاعدة أنت عاوز تقعد اقعد أنت وامك أنا مروحة
- أم أمل: ياختشي عيب مايصحش تكسري كلام جوزك
- مرات أخوها: مروحة يعني مروحة يلا ياواد امشي قدامي يفضى البيت على أم أمل وأبو أمل
- أبو أمل: عجبك كدة ياولية ولعتي الدنيا ف بعضها
- أم أمل: ياخويا وأنا مالي هما اللي قفشوا في بعض أنا كت بخلص

- أبو أمل: حسبي الله ونعم الوكيل حتى ف الشهر الكريم
مأنتيش سايبة الناس ف حالهم منك لله.

- أم أمل: بتقول حاجة ياخويا

- أبو أمل: لاء ده أنا بقول الجو حر نار النهاردة

- أم أمل: اه والله ياخويا عندك حق مش كانوا اتخانقوا بعد
القطار أعمل إيه ف الاكل اللي أنا عملاه ده كله يلا
مالهمش نصيب كل لقمة بتتادي أكلها والنبي أنا غلط ف
حاجة

فتكوا بعافية



الحلقة العشرين

هدوم العيد

الشخصيات:

أم أمل

أبو أمل

حماسة

أمل

سواق الميكرو باص

مجموعة ركاب

- أم أمل: بقولك إيه يابو أمل ياخويا أنا هاخذ العيال وأنزل نجيب هدوم العيد م العتبة قبل زحمة العيد آخر أيام الحاجة بتولع ويبينزلوا الحاجة أي كلام
- أبو أمل: ياولية إحنا فين والعيد فين لسه بدري
- أم أمل: ياخويا مش بدري ولا حاجة ده هما كام يوم السنة اللي فاتت ماكناش عارفين نمشي م الزحمة
- حماسة: ادوني فلوس وأنا أنزل مع أصحابي

- أم أمل: أصحابك ده إيه ياواد أنت ما عندكش دم ولا نخوة
تسيبنا أنا وأختك ننزل ف الزحمة لوحدينا
- حماسة: ياما أنا عاوز اجيب ع مزاجي أنت بتكسفيني وعاوزه
تلبسيني ع مزاجك
- أمل: وأنا كمان ادوني فلوس وأنا انزل اجيب لنفسى
- أم أمل: لا والنبي عجبك كدة ياللى تتشك يا حماسة
- حماسة: أنا عملت حاجة ياما أنا راجل
- أمل: وأنا أكبر منك
- أم أمل: بس يابت إنتي وهو هتتخانقوا ولا إيه محدش هيروح
لو حده يلا البسوا هتنزل مع بعض
- حماسة: يوووه أنا مابقتش صغير
- أم أمل: يوووه ف عينك واد قليل الأدب ماتشخط ف عيالك
ياراجل
- أبو أمل: هو إنتي مديه فرصة لحد يتكلم ده إنتي نطة ف
زورنا كلنا
- أم أمل: لاء أسيب كل واحد يعمل اللي ع مزاجه والنبي أنت
اللي عملك أب ظلمك راجل سلبي

- أم أمل: مالنا إزاي يشرب براحتة بس ف الشارع إحنا ذنبنا إيه نشرب معاه ده كده الميكروباص كله بيشم الدخان
- راجل راكب: ماتظفي يابني السيجارة صحيح احنا ناقصين خنقة
- الراكب: حاضر ياعم أهووو ويحدف السيجارة من الشباك
- أم أمل: أيوة ياخويا خاف ع صحتك أنت لسه صغير وكمان وفر فلوسك دي علبة السجاير بقت بالشيء الفلاني
- حماسة: خلاص ياما معلش ياهندسة
- أم أمل: معلش ع إيه دة أنا خايفة عليه هي الصحة بتتعوض يطلع السواق بقولكوا إيه ياخونا الأجرة خمسة جنية
- أم أمل: ليه ياخويا هي مش أربعة جنية
- السائق: بقولك إيه ياست مفيش عجل والدنيا زحمة
- أم أمل: ياغني إيه مفيش عجل هو إحنا تحت رحمتك ولا إيه
- السائق: بقولك إيه ياست مش عجبك أنزل
- حماسة: ياما اهدي شوية جرى إيه ياسطا مفيش شوية رحمة

- السائق: بقولك إيه ياكابتن اللي عجبه يركب واللي مش عجبه
يتفضل ينزل
- أم أمل: كلمني أنا ياخويا وأنت من ساعة ماطلعت وأنت
عدلت المرايا ونازل بص للبت مش تحترم نفسك وكمان
الأجرة خمسة جنيهه ليه فردة ولا فاتحة صدر
- الركاب: صحيح ياسطام كل السواقين بيطلعوا بأربعة جنية
- السائق: بقولكوا إيه اللي معاه يركب واللي مامعوش ينزل
- أم أمل: ننزل نروح فين بقى إحنا قاعدين ف الكتمة دي وف
الآخر تقول انزلوا طب إيه رأيك محدش نازل
- السائق: يركن العربية طب أهو يلا ياخونا العربية عطلانة
ومش طالعة
- الركاب: تتزعمهم أم أمل كله بيزعق هو ف إيه يا سطي هو
إحنا صحيح تحت رحمتك استهدى بالله ياسطي
- أم أمل: بقولك إيه ياسطي لم يومك واطلع واعتمد ع الله
أحسنك
- السائق: جرى إية ياست إنتي أنتي بتهدديني ولا إيه طب مش
طالع

- أم أمل: اجري ياوادي احماسة من ع الناصية هاتلنا أمين
شرطة أما نشوف هيطلع ولا مش هيطلع
- واحد م الركاب: ياعم إطلع وأنا هديك الفرق
- أم أمل: ياخويا أنت فلوسك كثير أنت هتبقشش علينا ولا إيه
أنا محدش يدفعلي حاجة
- الراكب: ياستي أنا ماقلتلكيش ادفعي
- أم أمل: ولا أنت تدفعلي دة أنا كلي فلوس بس ماحبش حد
يستكردني هيطلع ومش هندفع غير أجرته وهشوف كلام مين
اللي هيمشي
- الراكب: أيوة صحيح محدش هيدفع زيادة مهو أمثالك اللي
مطمعينهم خناقة والكل ينزل ضرب ف السواق يلا نطلع ع
القسم
- أم أمل: يلا ياوادي نشوفلنا ميكوروباص غيره احنا كدة هنتاخر
مش هنلحق السحور سواقين جشعين ما عندهم مش رحمة
يلاااااا فتكوا بعافية



الحلقة الواحد وعشرين

كذب المنجمون

الشخصيات:

أم أمل

أبو أمل

حنان

جوزها

التليفزيون وإعلان عن جلب الحبيب والمغربية والشيخ مش

عارف إيه

- أم أمل: هو إيه ده والنبي دي ناس مبروكة ترجع الحبيب وتصلح الراجل ع مراته دي حاجة فل أووووي
- أبو أمل: يا وليه إنتي بتصدقي الكلام دة
- أم أمل: يووووه بقا هيعملوا إعلان ويكلفوه ويطلعوا ما بي فهموش دول ناس فاهمين بيعملوا إيه السحر كله عندهم
- أبو أمل: وأنتي عرفتي منين الكلام دة

- حنان: بتضحك يالهوووى ياخالتشى دة أنا ما قدرش أعمل
كدة ده أنا أطلق فيها ياخالتشى
- أم أمل: تطلقى دة إيه أمل أنا طالعالك ليه
- حنان: خير ياخالتي؟
- أم أمل: خير ياحببتى وكل خير
- حنان: استنى ياخالتشى أعمل كبايتين شاي وأجيلك تحكيلى
- أم أمل: لاء ياختشى اقعدى أنا احكيلك أحسن سايبية اسم
النبي حارسه ولسة بوضب الفطار
- حنان: شوقتيني ياخالتشى قولى بقا
- أم أمل: بصى يابت ياحنان إنتى عارفة أنا بحبك إزاي زيك
زي اسم الله عليها أمل ف شيخ ببيجي ف التلفزيون ودي
النمرة بتاعته ومعاه كمان شيخة يعملولك حاجة يخلوا الواد
جوزك بتشعلق فيكى ولا يبص كدة ولا كدة
- حنان: يالهوووى ياخالتشى إنتى بتقولى إيه .. اعملوا عمل
- أم أمل: عمل إيه عمله أسود ومنيل دة إنتى هتفاظى ع بيتك
ياخيبية

- حنان: لاء ياخالتي كله إلا كدة
- أم أمل: يابت ياموكوسة خليه لما تتلم عليه واحدة وتلطشوا منك أنا بنصحك وأنتى حرة
- يدخل عمر: إنتي لسه ياحنان هتمشي وري كلام الولية دي
- حنان: أنا قتلها لاء والنبي ياخويا
- أم أمل: هو أنا ياواد بقولها حاجة غلط
- عمر: ياستي مالكيش دعوة بينا
- أم أمل: جرى إيه ياواد هي دي ازيك ياخالتي اللي بتقولها لي دة أنا لو جاية استلف منك مش هتقابلني كدة جتك وكسة
- عمر: ياستي سبينا ف حاننا
- حنان بتوصلها ع الباب ماتزعليش ياخالتي حقك عليه
- عمر: الولية دي مش هتسكت غير لما تخرب عليكي
- حنان: خلاص يا عمر أهي نزلت
- أم أمل: داخله شقتها مكسوفة وبتكلم نفسها هو الواد ماله أنا غلطانة إنى عاوزاهم يبقوا حبايب ومفيش حاجة تفرقهم أنا اللي أستاهل كل مرة الدفة تتقلب عليا يعني فيها إيه لو

سمعوا كلامي يلا يكش يولع فيها أنا مالى والنبي ما حبش
اتحشرف اللي مايخصنيش لولاش قلبى الأبيض
يلاااااااااا فتكوا بعافية



الحلقة الثانية والعشرين

زيارة بنت أختي

الشخصيات:

أم أمل

أبو أمل

سماح

حماتها

- أم أمل: بقولك إيه يابو أمل ياخويا أنا رايحة ياخويا أبص ع البت بنت أختي من يوم الصبحية وأنا مابصتتش عليها
- أبو أمل: ياولية ماتسيبي البت ف حالها دي لسه عروسة
- أم أمل: يوووو وأنا بقولك هروح أبات عندها أنا رايحة أبص عليها وأرجع مسافة السكة.
- أبو أمل: مأنتي كنتي لسه عندها ماكملتش أسبوعين متجوزة
- أم أمل: أيوة يارالاجل أمل يقولوا عليها مقطوعة ومالهاش حد

- سماح: وماله ياخالنشي مهى ذى أمى بردوا
- أم أمل: يالهووووى عليكى يادى البت أوعى تقولى كدة وييجى اسم النبي حارسه وصاينه جوزك يلاقىكي بلبس المطبخ
- سماح: لاء مانا بطلع لما ييجى ياخالنشي ألبس وأتزوق
- أم أمل: اسمعى منى لازم تعوديهم إن هما اللي يخدموكى إوعى تطاطى حماتك هستوطى حيطك وتبقى الملطشة وجوزك شهر والتانى وهيزهق وتبقى عنده خدامة لأمه وخلص
- سماح: تبتدى ف العصبية وتسبب المطبخ تلتفت تلاقى حماتها
- حماتها: منورة ياست أم أمل ياختى بدل ما تتصحيحها تاخذ بالها من بيتها وجوزها جايا تقويها علينا
- أم أمل: مهو بردوا ياختشى مايصحش البت لسه عروسة ف شهر العسل وتنزل وتخدم هما اسم الله عليهم بناتك مش أولى بخدمتك
- حماتها: جرى إيه ياختى إنتى جاية تنظمى المرور ف بيتنا تنزل امتى ولا مين يخدم ومين مايدمش
- أم أمل: البت لسه صغيرة وأنتوا واخذنها ع الحامى أنا ياما قلت لأختى بلاش جواز بيت العيلة بس هى اللي هبلة

- حماتها: وهبلة ليه ياخشى كت رمتها ف الشارع
- سماح: خلاص ياحماتي حصل خير
- أم أمل: خير إيه ياموكوسة إنتي ياخشى بتكلمي كدة ليه وأنت كتوا خدتوها خدامة
- حماتها: بقولك إيه يأم أمل إنتي جاية تخربي ع بنت أختك ولا إيه
- سماح: خلاص ياخالتي
- أم أمل: لاء إنتي ليكي راجل لازم ياخذلك حقك ويوقف كل واحد عند حده
- سماح: اسكتي بقى ياخالتي ... حقك عليه ياحماتي
- أم أمل: عيني عليكى وع بختك الأسود يابنت أختي طب ده الواد زكريا خطيب البت أمل يتملها الرضا ترضى
- حماتها: بقولك إيه ياسماح اللي يدخل البيت ده يدخل بأدبه واللي مش عجبه الباب يفوت جمل
- أم أمل: إنتي بتطرديني ياولية يا ناقصة مش تحمدوا ربنا إن إحنا رضينا نناسبكووا جتكووا الأرف عيلة هم وأنتي ياختي عجبك الخدمة وكسرة النفس خليههم يركبوكي ماتجيش بعد

كدة تشتكي لما يدوكي بالجزمة أنا اللي غلطانة قال يداخل
بين البصلة وقشرتها
يلا فتكوا بعافية



الحلقة الثالثة والعشرين

المرتب طار

الشخصيات:

أم أمل

أبو أمل

أمل

حماسة

- أبو أمل: ادى المرتب اعملى حسابك ان احنا بعد كأم يوم داخلين ع العيد
- أم أمل: ايوة ياخويا لازم ننزل نجيب طلبات للبيت
- أبو أمل: خدي حد م العيال وانزلي
- أم أمل: لاء ياخويا رجلي ع رجلك تنزل معايا عشان عارفة لسانك هتفضل تقولي صرفتي ف إيه ووديتي الفلوس فين
- أبو أمل: ياولية وأنا ذنب عليا اشتغلك شيال
- أم أمل: وأنا يعني اللي شغللكوا شيالة وخدمة وطباخة ويارتني مشكورة ولا من عيالك ولا منك محدش عجبه العجب

- أم أمل: يلا ااع الظالم ياخويا تنزل أم أمل وأبو أمل جايبين
شنطة صغيرة فيها فرخة وكيلو لحمة
- أبو أمل: اعملي حسابك مفيش فلوس لآخر الشهر أنا خلاص
ضغطي على ولو حلت هيطلع عندي السكر
- أم أمل: يادي الهنا ياخويا هو حد لاقى السكر
- أبو أمل: ياويله إنتي بتهزري وأنا تعبان
- أم أمل: سلامتك ياخويا أنا نسيت أقولك علاج الموراتيزم
خلص
- أبو أمل: ياويله ارحميني هلاقيها منك ولا م المصاريف ميه
ونور وغاز وأكل وشرب وعيشة تمرر أروح أشوفلي مصيبة
وأغور من وشك
- أم أمل: ليه ياراااجل بعد الشر عليك اهدى ياخويا لتجيلك
جلطة
- أبو أمل: أيوة أهو ده اللي ناقص
- أم أمل: ياما احنا ما عزمناش زكريا وأمه ع الفطار
- أم أمل: ما خلاص ياختشي خالص الشهر ع خير هو حد فاضي
يعزم حد دلوقتي الناس دلوقتي تلم سجاجيده وستايرها يلا
شدي حيلك تنضيفه العيد استعدي

الحلقة الرابعة والعشرين

عزاء واجب

الشخصيات:

أم أمل

أبو أمل

أم محمد

بعض سيدات ف العزاء

- أم محمد: لأم أمل إنتي عرفتي ياختي إن عرفة جوز أم عماد
تعيشي إنتي
- أم أمل: إمتة ياختي والنبي ماعرفت
- أم محمد: ياختشى ده النهاردة التالت
- أم أمل: أخس عليكي يأم محمد طب ياختي كتي قولي ده
الولية جاتلي ف خطوبة أمل وباركتلي
- أم محمد: ياختشى إحنا فيها قومي بينا نروح نعزى
- أم أمل: لاء ياختشى لما بييجي اسم النبي حارسة وصاينة أبو
أمل يتغدى

- وبعدين نروح ياختي واجب لو إنها وليه ناقصة وما عندهاش دم

- أم محمد: ليه ياختشي

- أم أمل: ده وليه حرباية مهى ساكنة فوق بنت خالتشي ديك النهار روجت أزور بنت خالتشي لقتها شايطة منها ع الآخر، الولية الناقصة تشر عليها الغسيل مش هين عليها حتى تعصره، تقولي فاتحة حنفيه ع الغسيل قتلها لاء ماتسكتيش اطلعي وبهدليها وان اتكلمت اندهي عليه بس بنت خالتي دي هبلة خافت تتكلم جوزها يبهدلها

- أم محمد: يالهووووي وسكتلتها

- أم أمل: لاء ياختشي مهو أول ماجه جوزها اشتكتله وخليت جوزها يطلع يرد ع اللي انيها مهم ناس يخافوا ما يختشوش ياعيني الله يرحمه بقاااااا

- أم محمد: طب أنا هنزل يأم أمل وبعد ماتغدي أبو أمل عدى عليه نروح مع بعض اهو واجب وخلص

- أم أمل: ايوة ياختي واجب

- أم أمل وأبو أمل يابو أمل مادرتش ياخويا

- أبو أمل: خير استر ياستار
- أم أمل: خير ياخويا دة الراجل اللي اسمه أبو عماد تعيش أنت
- أبو أمل: لا اله إلا الله صحيح ربنا بيزين جنته الحلو اللي بيروح
- أم أمل: تقصد إيه ياخويا
- أبو أمل: يا وليه أنا بقول الله يرحمه كان راجل طيب
- أم أمل: طيب منين يا راجل ده كان راجل ناقص ومبصباتى
- أبو أمل: ياولية اتقى الله
- أم أمل: والنبي ياخويا زي ما بقولك كدة ف الطاعة والنازلة كان ببصص عليا
- أبو أمل: أتاريه ربنا كرموا ومات
- أم أمل: ده أنت يومك مش معدي بتقول إيه ياراجل
- أبو أمل: بقول الله يرحمه
- أم أمل وأم محمد داخلين العزا
- أم أمل: البقية ف حياتك يأم عماد

- أم عماد : حياتك البقية
 - أم أمل: تجلس بجوارها شدي حيلك ياختشي
 - أم عماد : الشدة بالله والنبي كان أمير الله يرحمك يابو عماد
 - أم أمل: عملتوا إيه ف المعاش ياختي
 - أم عماد : معاش إيه ياختي احنا ف إيه ولا إيه
 - أم أمل: هو كان بيقبض كام
 - أم عماد : ياختشي أنا اعرف إحنا ف إيه ولا ف إية
 - أم أمل: بتميل ع أم محمد شوف ياختشي الولية ولقمها هو أنا
هحسدها قال حسدوا العجرع ضل الشجر
 - أم محمد: احنا مالنا يأم أمل إحنا جايبين نعزي وهنمشي
 - أم أمل: الحق عليا اللي عاوزة أطمئن عليها وع العيلين الغلابة،
يلا دول عالم مايتعشروش أنا اللي غلطانة خليني ف حالي
- يلاااااا فتكوا بعافية



الحلقة الخامسة والعشرين

العين تفلق الحجر

الشخصيات:

أم أمل

أبو أمل

زكريا

أم زكريا

أمل

- أمل: ياما خلصتي ولا لسة الناس زمنهم جاينين
- أم أمل: يابت مالك متلهبة كدة ليه لسة بدرى
- أمل: ياما مآنتي عارفة حماتي مايبعجبهاش العجب
- أم أمل: ياخشى انشالله ماعجبها يعني هما اللي أملة أووووي بلا ستين وكسة عليكى إنتي بس اللي ما عندكيش نظر
- أمل: ليه بس ياما دة زكريا بن حلال وبيحبني
- أم أمل: حبك برص منك له ده يغور من وش أمه لله ف لله أنا ماقبلش الولية دي

- أمل: خلاص ياما هو أنا هتجوزوا ولا هتجوز أمه
- أم أمل: لاء ياخشى هتتجوزي الاتنين هو الواحد يتاخذ غير من وش أهله هو لولا عارفين إنى ف حالي وما بنطقش العيبة كانوا إتقدمولك ولا فكروا يخشوا بيتنا ولا أبوكي المدهول اللي لا بيقول عاوزين ولا عاوزين وضحكوا علينا وكلفتونا بكلمتين
- أمل: هاتي ياما حاجة السلطة أنا أعملها
- أبو أمل: أنتوا لسه ما خلصتوش
- أم أمل: ياخويا اصبر أنت راخر والنبي ماحد جايلنا الكفية غيرك أنا بصراحة يابت يا أمل بخاف من داخله الولية دي علينا عنيتها وحشة وماتدخلش علينا إلا لما تحصل مصيبة
- أمل: ياما إنتي بس اللي حطاها ف دماغك شوية
- أم أمل: ليه ياخشى هحطها ف دماغي ودي إية دي كمان اللي هحطها ف دماغي ربنا يكفيننا شر عنيتها
- أبو أمل: هي أمك دي حد بينفد من تحت إيديها
- أمل: بس يابا خلي اليوم ده يعدي ع خير
- أم أمل: أنتوا بتتودودوا ع إيه ونازلين راغي تعالي يا حلوة بصي
ع المحشي

- أمل: حاضر ياما
- جرس الباب، تفتح أمل: ياما ده زكريا ياما
- يخرج أبو أمل: يا مرحب اهلا بالناس الكمل
- أم أمل لأمل: ف المطبخ دك داهية راجل منافق اللهم مانى صايمة شفشق العصير يقع من إيد أمل
- أم أمل: هلت البشاير مش عارفة تشيلي الشفشق يأم إيد سايبة
- أمل: ياما الحمد لله خد الشر وراح
- أم أمل: خدوا وراح فين مهو لسه هنا خشى ياختي اقعدي معاهم لما احط حاجة ع راسي واجي أسلم عليهم
- أمل: اهلا ياحماتي
- حماتها: مش عاجبها أمال أمك مش عاوزة تيجي تسلم علينا ولا إية
- أمل: لاء ياحماتي دي واقفة من صباحية ربنا ف المطبخ
- حماتها: امممممم هنشوف
- تدخل أم أمل وهي داخلة برواز يقع ع راس زكريا

- أم أمل: ياساتر يارب أهلا منورة يأم زكريا
- أم زكريا: ده نورك ياختشي
- أبو أمل: أصل البرواز قديم وتلاقي الفتلة دابت
- يقوم أبو أمل يخبط الفاز يوقعها تنكسر
- أم أمل: قومي يابت يا أمل هاتي المبخرة خلينا نولع شوية
بخور نطرد العين الوحشة
- أم زكريا: تقصدي إيه يأم أمل
- أم أمل: لاء ياختشي بعيد عنك أصل ف ناس دخلتهم بعيد
عنك بتبقى بالشمال
- أم أمل: اسكتي ياما لاء ياحماتي أمي بس اللي م الصبح تعبانة
ف المطبخ والدنيا صيام ذي مأنتي عارفة
- أم زكريا: ف ريحة حاجة بتتحرق
- أم أمل: اجري يابت يا أمل بصي ع المحشي
- أم أمل: تجري ع المطبخ وترجع ياما
- أم أمل: ف إيه ياحيله أمك
- أم أمل: ياااما

- أم أمل: ماتقولي ف إيه يابت
- أم: ياما قومي عاوزاكي
- أم أمل: يابت قولي ف إيه، ماصدقت قعدت
- أم: ياما المحشي اتحرق
- أم أمل: الله وأكبر جالكوا كلامي ياترى ف إيه تاني لاء الموضوع
كدة مابقاش طبيعى هي عين الل..... وأمل تبصلها تكمل أم
أمل الجمل يابت اللي ماحطنهاش ع الكنافة قطيعة نسيت
- أم زكريا: ليه ياختشى هو أنتوا ماعندكوش عين جمل ولا إيه
اه المكسرات غالية السنة دي
- أم أمل: مهو أنتوا ياختشى حاجة رمضان اللي جاييها ابنك
ماكنش فيها مكسرات اشى قمر الدين ع البلعع شوية جوزة
الهند
- أم زكريا: رن ع أبوك يازكريا شوفوا فين
- زكريا: يمسهك التليفون ده الرصيد خلص أنا نازل اشتري
كارت
- أم: استنى يازكريا هجبلك تليفوني اتكلم أنا معايا رصيد

- أمل جايبية تليفونها يقع يتكسر
- أم أمل: أعوذ بالله من غضب الله وتقوم وتدخل بالبخور قل
أعوذ برب الفلق وتقرأ المعوذات
- أم زكريا: عندها حساسية م البخور والريحة تملأ المكان تجلها
حالة من ضيقة النفس
- أم: ياما اخرجي بالمبخرة
- أم أمل: لاء ياختي العين فلقت الحجر
- زكريا: ياما مالك ياما غيبوبة
- تقف أم أمل تكلم نفسها أنا قلت أبخر أطرده العين الوحشة
بيني هطرده الولية م الدنيا خالص يلا خلينا نخلص ويبقى
قضاء ربنا والنبي أنا غلط مش هي اللي عنيهامدورة
وحسادة يلا عشان الفطار خلاص الأدان قرب
فتكوا بعافية



الحلقة السادسة والعشرين

مدارس ومدرسين

الشخصيات:

أم أمل

أبو أمل

حماسة

أمل

- أم أمل: بتصحي حماسة ياواد يالا ااااا الساعة دخلت ع
سابعة
- حماسة: ياما حااااضر
- أم أمل: ياواد قوم يابارد
- حماسة: ياما لسة بدرى
- أم أمل: ياواد قوم هتتاخر
- حماسة: يقوم يقعد ف السرير ياما يعني أنا بروح المدرسة
أعمل إيه

- حماسة: طب ماهما المدرسين اللي بيقولولنا ماتجوش
- أم أمل: قول لأبوك لو حد ماالمدرسين عاملك حاجة أبوك يروح يتخانق وياخدلك حقك ماتخافش
- حماااصة: بيضحك
- أم أمل: بتضحك على إيه ياواد ياقليل الأدب أنت مستهون بأبوك
- أبو أمل: قول ياواد حد فيهم كلمك
- حماسة: حد يكلمني أي ده كلهم أصحابي محدش بيتكلم معايا ولا حد يقدر يتكلم
- أبو أمل: يعنى إيه أصحابك ياد احترم مدرسينك وخليك محترم طب ده أنا وأنا ف سنك كت لما اشوف المدرس بتاعي ألف م الشارع الثاني الله يلعن الزمن اللي بهدل التعليم كدة
- حماسة: مالك يابا عملتها ازمة ليه
- أم أمل: أزمة دة إيه ياواد والنبى مانت نافع
- حماسة أنتوا مش ليكوا اللي أنا أنجح
- أم أمل: وهنتجح إزاي يا حيلة أمك أنت لا مذاكرة ولا عاوز تروح مدارس

- أبو أمل: وفلوس ذي المنشار ع المدرسين
- أمل: ماكل العيال بتعمل كدة كله بيذاكر ف البيت
- أم أمل: بيت إيه وغيط إيه أنا لا شيفاه بيذاكر لا برة ولا جوة
- حماسة: ياما أروح المدرسة أعمل إيه
- أم أمل: تسمع المدرسين بيقولوا إيه
- حماسة: مهو المدرسين بيدخلوا الفصل أول السنة يعرفنا بنفسه وخلص ع كدة
- أبو أمل: يعرفك بنفسه ع أساس إنه جاي يخطب أمك
- حماسة: يوووووووة
- أبو أمل: كمان مش عجبك يا حيلة أمك
- أم أمل: مهو أنت اللي بتقول كلام يفور الدم يارالجل
- أبو أمل: كلام إيه يا أولية وأنتي اللي عجبك كلام ابنك
- أم أمل: أنا لا عجبني كلامك ولا كلامه
- أبو أمل: يعني أمسكوا أدله قلمين ع الصبح
- أم أمل: ياخويا هتضرب الشحت دة دة بقى طولك

- أبو أمل: خليه جنبك ياختي دلعي فيه
- حماسة: يابا إحنا بناخد ف الدروس الحاجات اللي بناخدها
ف المدرسة
- أبو أمل: يعني مفيش ضمير
- حماسة: أنت كدة جبت الناهية أنا كده كده هنجح
- أم أمل: إزاي ياخيلتها ع رأي أبوك
- حماسة: المدرسين آخر الترم يدونا الملزمة التمام اللي فيها
الخلاصة أذاكرها وخلصت الحكاية
- أم أمل: ياخويا ماكنش حد علب
- حماسة: كله بيلخص دلوقتي ويعمل كدة مابقاش حد بيروح
مدارس
- أبو أمل: عليه العوض ومنه العوض
- أم أمل: طب ماخلاص ماتروحش الدروس وابقى خد الملزمة
اللي فيها الكلام اللي بينجح وخلصا ليه وجع القلب
- حماسة: ماينفعش مهو لازم أكون باخد دروس عنده والملزمة
كابتتصورش بيبقى فيها حتة سودا

- أبو أمل: حسبى الله ونعم الوكيل

- أم أمل: يعنى حجاز م الصيف ودروس طول السنة ومدرسين
وندفع فلوس الكتب وفلوس رايح وفلوس جاي وف الآخر حته
ملزمة فيها الملخص كله يتخسارة الفلوس عيني ع المدارس
والمدرسين الله يرحم لما كان المدرس له هيبه ولا المدارس اللي
كانت تحية العلم لوحدها تهد الدنيا يلا أيام الفلوس فيها
موتو الضمير

يلاااااااااا فتكوا بعافية



الحلقة السابعة والعشرين

خطوبة الدكتور

الشخصيات:

أم أمل

أبو أمل

أم سعيد

أم العروسة

سعيد

أبو العروسة

جارية أم أمل أم سعيد ف زيارة وبتكلم أم أمل

- أم سعيد: كل سنة وأنتي طيبة يأم أمل

- أم أمل: وأنتي طيبة ياختشى اللي ما حد شافك من أول رمضان

- أم سعيد: مأنتي عارفة ياختشى نهار رمضان قصير إزاي ع مانقوم نوضب الفطار يبقى اليوم طار ويدوب نفطر نصلي التراويح وننام للسحور وكل يوم ع كدة

- أم أمل: صحيح ياختشي ع قولتك كل سنة وأنتى طيبة ياختشى واسم الله عليه الدكتور سعيد عامل إيه لسه مانوتيش تجوزيه
- أم سعيد: والنبي بيحب بيت كدة كان شافها ف فرح واحد صاحبه ومن ساعتها وهو متعلق بيها وعاوز يخطبها
- أم أمل: وماله ياختشى ماتخطويها له ده اسم الله عليه عدى التلاتين وماحلتكيش غيره .. ياختشى افرحي وفرحية
- أم سعيد: مأنتي عارفة يأم أمل ياختشى من يوم أبوه مامات وأنا أمه وأبوه واخواتى ف إسكندرية
- أم أمل: أنا أجي معاكي ياختشي ده احنا أهل يأم سعيد ده زيه زي حماسة
- أم سعيد: مش عاوزة أتعبك ياختشى أنا بقول لسة بدرى
- أم أمل: ياختشى مابدريش ولا حاجة عاوزين نفرح بيه يلا وتبقى الخطوبة ع العيد إن شاء الله
- أم سعيد: خلاص ياختشي نروح يوم الجمعة نتفق
- أم أمل: أيوة كدة ياختشى ع بركة الله إما أقوم أجيبك حته كنافة تحلي بوقك
- أم أمل: أنا رايحة يآبو أمل مع سعيد وأمه هيشوف عروسة

- أبو أمل: ياولية إحنا ماننا
- أم أمل: ياراجل ماننا إزاي ده الجيران لبعضيهم
- أبو أمل: لا حول ولا قوة الا بالله دي أمور شخصية ياستي
- أم أمل: شخصية إيه ياراجل ده بدل ماتقول أجي معاكوا وأنت عارف إن الواد وأمه مالهمش حد
- أبو أمل: ومالقوش الا إنتي ربنا يستر والأجازة تتم
- أم أمل: بتقول إية ياراجل
- أبو أمل: ماباقولش ربنا يسلم
- أم أمل وأم سعيد وسعيد: دخلوا ف صالون يدخل أخو العروسة شاب صغير وبعدين أم العروسة وأبو العروسة
- أم العروسة: أهلاً وسهلاً
- أم سعيد: دي ياختي جارتنا أم أمل وهي اللي مربية سعيد وزي أختي
- أم العروسة: يامرحب أهلاً وسهلاً
- أم العروسة: تقعد جنب أم أمل
- أم أمل: وإحنا ياختي مش هنشوف العروسة

- أم العروسة: اجري ياواد قول لأختك تجيب الشاي
- أم أمل تميل ع أم سعيد: شاي ده إيه يمكن يجيبوا الساقع بعد
قراية الفاتحة
- أم سعيد: تبص وماتتكلمش
- أم أمل: احنا جايين ياخويا ناخد اسم الله عليها لابننا الدكتور
سعيد
- أبو العروسة: دة إحنا نتشرف يا حاجة
- أم أمل: حاجة ف عينك
- أبو العروسة : بتقولي حاجة
- أم أمل: لا ياخويا الله يشرف مقدارك
- أم سعيد: طلباتك إيه يا حاج
- تدخل العروسة بصينية الشاي
- أم أمل: تميل ع أم سعيد ياختي ولا شكل ولا منظر
- أبو العروسة: ياستي إحنا بنشتري راجل خلي الخفيفة عليكوا
والتقيلة علينا

- العريس يجيب تلت أوض والأجهزة وإحنا هنجيب المطبخ
والتجيد

- أم أمل: وإن شاء الله السجاد والنجف ع مين

- أم العروسة: اهو ياختي نقسم البلد نصين العريس يجيب
السجاد والستاير وإحنا هنجيب النجف بس لازم يجيلها شبكة

- أم أمل: والشبكة دي بكام بصلي ع النبي

- أم العروسة: أهو زيها زي بنات العيلة مش هنتقل عليه أهو
هيبقي ابننا بردوا نقول عشرين ألف والفرح ف نااتي

- أم أمل: ياختشى امال لو ماكنتوش بتشتروا راجل كتوا عملتوا
ف الواد إيه اللي بنتكوا لا كسم ولا منظر

- أم العروسة: إنتي بتقولى إيه ياولية إنتي ده أنا بنتي مفيش
زيها ف الحته كلها ماتعدلي كلامك أنتوا جايين تهزاوننا ف
بيتنا

- أم أمل: بيتكوا إيه يأم بيت ده احنا ابننا دكتور اد الدنيا

- أم العروسة: دكتور ده إيه ياالدعدي اللي جاي بشقة إيجار
جديد ده كل مرتبه مايكملش ألف ونص ف المشتشفى

- أم أمل: بكرة ياختي يفتح عيادة ولا يبقى حد ذيه

- أم العروسة: موووت يا حمار
- أم أمل: هى وصلت لكده قوم يا حبيبي يلا يأم سعيد ده أنا هجبلك عروسة نقاوتى دول ناس مايتعشروش
- ماشية هي وأم سعيد وسعيد ولا كلمة
- أم أمل: ماتزعلش نفسك يا حبيبي والنبي ده أنت جنبها قمر سيبك منها ده أنت تقعد ع البساط وتتقى ست البنات هو أنت ف ف أدبك ولا أخلاقك مالكوا ساكتين ليه أيوة ليكوا حق تزعلوا من مقابلتهم الباردة ولا يهمكوا بركة ان الواد نفذ بجلدوا منهم يلا خيرها ف غيرها يا حبيبي فتكوا بعافية



الحلقة الثامنة والعشرين

سفر عماد

الشخصيات :

أم أمل

أم عماد

أبو أمل

عماد

أم أمل فى زيارة لأم عماد

- أم أمل: اذيك ياخشى سامحيني أنا من يوم موته أبو عماد

وأنا مش قادرة ازورك مانتى عارفة الدنيا تلاهى

- أم عماد: لاء ياختى كتر خيرك أنا عارفة كل واحد فيه اللى

مكفيه

- أم أمل: اه والنبي ياختي أنا طول الشتا الموراتيزم مكسحني

وأبو أمل اسم النبي حارسة وصاينه ببيجي من شغله عاوز

يلاقى اللقمة جاهزة والعيال اسم الله عليهم زي مانتى عارفة

مذاكرة ومصاريف وهم مايتلم

- أم عماد : ربنا يخليك راجلك ياخشي
- أم أمل: تعيشي يأم عماد عملتوا إيه ياختي ف المعاش
- أم عماد: الحمد لله ياختي اهي ماشية بس والنبي ياختي
الواد عماد هو اللي مغلبنى
- أم أمل: ليه ياختي كفى الله الشر
- أم عماد: أبداً ياختي طالعة ف دماغوا اليومين دول يسافر
برة
- أم أمل: برة فين ياختي
- أم عماد: برة مصر ياختي
- أم أمل: برة مصر فين اسنجرية يعني.
- أم عماد: ياريت ياختي إسكندرية إيه ده عاوز يسافر برة
خالص
- أم أمل: لاء ياختي أوعى تهاودية طب دة أنا اخويا سافر
ليبيا والدنيا اتقلبت والحرب قامت بدل مايجيب فلوس جاى
يامولاية كما خلقتني
- أم عماد : يالهووى ياختي والنبي ماتخوفيني

- أم أمل: والنبي ياخشى ذى مابقولك خليه جنبك مابقتش فى بلد مضمونة

- أم عماد: تصدقي عندك حق ياخشى وجعتي قلبي يا م أمل

- أم أمل: ليه ياخشى إنتي تقويله أنا ليه إلا أنت هتسافر إزاي

- أم عماد: أهو بيقول سنة واحدة أكون نفسى وأرجع أتلمع بنت حلال

- أم أمل: بيني وبينك يأم عماد إنتي ابنك كبر

- أم عماد: طب وأنا هعمل إيه ياختي هو واتخرج م الجامعة ومادخلش جيش عشان وحداني وأنا وهو وأخته إدي المعاش حتى مايبكفي مصاريفنا

- أم أمل: صحيح ياختي دة اتخرج م الجامعة يعني خرج م المعاش

- أم عماد: هو كدة وبس دة أنا بديله مصروف إيد زيه زي أخته اللي فى المدرسة ديك النهار قال أنزل أدورع أي شغلة وقف ف سنترال ع الناصية جاي آخر الشهر يقوله ف عدة ناقصة وهيطلعوا حرامي

- أم أمل: طب ده كلام والنبي شاب متخرج م الجامعة مش لاقيله شغله أيوة يعني صايح بمؤهل عالي

- يدخل عماد : اذيك ياخالتي أم أمل
- أم أمل: اذيك ياحبيبي هو ده اسمه كلام يا عماد
- عماد : خير ياخالتي
- أم أمل: عاوز يا حبيبي تسافر وتسبب أمك وأختك
- عماد: هعمل إيه ياخالتي
- أم أمل: لاء يا حبيبي دور ع حاجة ف مصر أي حاجة مهم بيطلعوا برة مصر يمسخوا البلاطع الأقل هنا بلاط بلدك
- عماد: والنبي سبيني ف حالي ياخالتي أنا اللي فيه مكفيني
- أم عماد: عيب ياواد رد ع الولية عدل دي بتتصحك
- عماد أنا عارف مصلحتي مش عاوز حد ينصحني ويسبها ويمشي
- أم أمل: لاء ياخوشي ده حد ماليه الصحاب بيغوا بعض أوعى تخليه يسافر خدي بالك منه ياختي
- أم عماد: اوعى تزعلي يأم أمل
- أم أمل: لاء ياختي هزعل ليه أنتوا حرين ف بعض يكش يولع
- أم عماد: بتقولي حاجة يأم أمل

- أم أمل: لاء ياختي دة أنا بقول ربنا يهديهولك
- أم أمل: تروح تلاقى أبو أمل
- أبو أمل: كنتي فين ياولية
- أم أمل: ياخويا كت بزور الولية أم عماد الواد ابنها قال عاوز يسافر برة فاكر اللي بيسافر بيروح يغرف م البحر ويرجع
- أبو أمل: ياولية إحنا لامالنا إنتي حشرة نفسك ف اللي مالكيش فيكي ليه
- أم أمل: هو إيه ياراجل يعني يسيب أمه وأخته الصغيرة ويسافر هو الشباب إيه اللي جرى له النخوة راحت فين
- أبو أمل: بردوا مالناش فيه
- أم أمل: بقولك إيه ياخويا أنا مايرضينيش الحال المايل
- أبو أمل: إنتي هتصلحي الكون خليكى ف حالك
- أم أمل: مأنأ ف حالى أهو هوأنا بتحشر ولا بتكلم طب ده أنا مسميينى نسمة طول عمري لا بهش ولا بنش.
- أبو أمل: لا حول ولا قوة الا بالله إنتي نسمة أمال الكوارث فين والمصايب فين وأم المشاكل فين

- أم أمل: ياخويا الكوارث في اللي بيصيبوا الكوارث تحصل
والمصايب، ف اللي شايفين المشاكل وساكتين ما بيحلوهاش أما
أنا خايضة ع الواد عماد فاكر أنت زمان لما سافرت العراق
والحرب قامت زي ماروحت زي ماجيت، بقت أمك الله
يرحمها تقولك راح القرد وجه يتمطع نابوا همه ونابوا غموا
ونابوا ضحك الناس عليه

يلااااا فتكوا بعافية



الحلقة التاسعة والعشرين

كحك العيد

الشخصيات:

أم أمل

أبو أمل

أمل

أخت جوزها

- أم أمل: بقولك إيه يابو أمل إحنا عاوزين نعمل الكحك ياخويا
- أبو أمل: ياوليه هو بقى في حد بيعمل كحك اليومين دول
- أم أمل: إزاي ياخويا لازم ربنا مايقطع لنا عادة هو العيد يبقى عيد من غير مانعجن ونخبز خلي العيال يفرحوا
- أبو أمل: ياوليه هما العيال صغيرين
- أم أمل: وماله يابو أمل ياخويا ربنا يخليك ليهم
- أبو أمل: وهجبلك منين فلوس أنت عارفة كيلو السمنة بقى بكام ولا كيلو الدقيق ده غير لوازم الكحك والتسوية ووجع القلب

- أم أمل: شوف ياخويا هتتشال هتتهبد هنعمل الكحك
- أبو أمل: لا حول ولا قوة إلا بالله استهدي بالله ياولية
- أم أمل: اغزى الشيطان ياراجل ماتكدهش ع نفسك وع البيت كله
- أبو أمل: الأمر لله بكرة أروح أعملي قرض بس ع الله الحق أصرفه
- أم أمل: تصرفه ماتصرفهوش ماليش فيه استلف من أمك أهى ع قلبها اد كدة
- أبو أمل: أنتى مالك ومال أمى خلىنا هنا
- تكلم أخت جوزها هتيجي امتى ياختشى نعمل الكحك مع بعض
- أخت جوزها: والنبي يأم أمل مصطفى مش راضى قالى هنجيب اتنين كيلو جاهزين
- أم أمل: ليه ياختى لاء لازم تعمى حتى تفرحي العيلين
- أخت جوزها: والنبي يأم أمل ماعايزة أعمل مشاكل مش هاخذ إياسة كل يوم غضبانة عند أمى
- أم أمل: والنبي تغضبي أحسن لكن الكحك لازم تعملي وتفرحيهم

- أخت جوزها: تصدقي عندك حق يأم أمل أصله بخيل أوووي
- أم أمل: بصراحة ياخشى جوزك نتن وأمه مقوياه
- أخت جوزها: هعمل إيه يعني يأم أمل أهى عيشة
- أم أمل: استحملي عشان خاطر العيال بس لازم تاخدي حقك
- أم أمل وامها بيعملوا الكحك وتدخل أخت جوزها
- أم أمل: تعالي ياختي مالك معيطة ليه
- أخت جوزها: مصطفى طردني أنا والعيال
- أم أم أمل: ليه يابنتي عملتي إيه ده إنتي لسه مروحة ماكملتيش
عشر أيام
- أبو أمل: ف إيه يامحاسن عملتي إيه هما الستات كلهم نكد
وقرف
- أم أمل: بتقول إيه ياراجل
- أبو أمل: مابقولش بقول عملتي إيه يامحاسن
- أخت جوزها: والنبي ماعملت حاجة
- أبو أمل: يعنى طردك م الباب للطاق واللّه ياخويا لسة بقوله
عاوزين نعمل الكحك

- أبو أمل: بس ماتكمليش فهمت
- أم أمل: فهمت إيه ياراجل بتبصلي كدة ليه؟
- أم أمل: مهى لازم تعمل كحك للعيال هي طلبت إيه يعني
- أخت أبو أمل: مش كدة والنبي ياخالتي
- أم أمل: أيوة ياحبتي ده موسم هو إحنا كل يوم بنعمل الكحك
ده من السنة للسنة
- أم أمل: وناوية تعملي إيه يامحاسن
- أخت جوزها: أنا قلت أجي لأخويا يروح يكلمه
- أم أمل: أيوة ينزل يكلمه ده داخل عليكوا عيد وعاوزين
مصاريف إنتي وعيالك
- أبو أمل: لا اله الا الله، إنتي أكيد اللي وري المصيبة دي
- أم أمل: أنا مالى ياخويا .
- أخت جوزها: الله يسامحك يأم أمل يارنتي ماسمعت كلامك
- أم أمل: طب وأنا مالى أنتوا كللكوا هترموا بلاويكوا عليا
وأطلع ف الآخر أنا اللي غلطانة، دي مصيبة سودا، مانشالله
ماعملتني لا كحك ولا بسكوت أنا كدة دايماً، عينى عليا ظالمنى
يلااااااااا فتكوا بعاءافية



الحلقة الثلاثون

ليلة العيد

الشخصيات:

أم أمل

أبو أمل

أمل

حماسة

أم أمل

حماتها

أخت جوزها

أخوها

مرات أخوها

الجميع ف بيت أم أمل ليلة العيد

- أم أم أمل: كل سنة وأنتوا طيبين ياولاد

- الجميع: وأنتي طيبة وربنا يعيده علينا بالخير

- أم أمل: ظروف إيه ياختى بس جوزك يفكها شوية
- أبو أمل: هو ماجاش معاكوا ليه
- اخت أبو أمل: والنبي عنده شغل
- أم أمل: ماتزعليش منى يامحاسن جوزك ده أنا مابطقهوشولا
بطيق قعدتوا الله يكون ف عونك
- مرات اخوها: أهو كل واحد ربنا بيحليله زادة
- أم أمل: ليه ياختي ماله أخويا هو ف حد زيه
- مرات أخوها: هو أنا قلت حاجة .
- حماتها: الليلة عيد يأم أمل
- أم أمل: قصدك إيه ياحماتي
- حماتها: ماقصديش حاجة ياختي وإنتي بقى أبو أمل عامل
معاكي إيه
- أم أمل: أبو أمل هو ف زيه، ده ملاك
- أبو أمل: إنتي بتتريقي ولا إيه
- أم أمل: لاء ياخويا أنا أتريق طب ده أنت مهنيني ومخيليني
ست الستات

- أخت جوزها: عيني عليه وع حظي ربنا رزقني بواحد نكدي
كسفني ع طول ف وسط الناس.
- أم أمل: الله أكبر قل أعوذ برب الفلق
- حماسة: أنا نازل أسهر مع أصحابي النهاردة
- أبو أمل: مافيش نزول م البيت النهاردة يعنى كلنا متجمعين
وأنت عاوز تنزل أنت البعيد ما عندكش دم
- أم أمل: ماتسيب الواد ينزل مالك وماله، أنت هتتكد عليه
ليلة العيد
- أبو أمل: بقى ده كلام إنتي بتكسري كلامي
- أم أمل: بقولك إيه أنا ساكته النهاردة وماليش نفس أتخانق
النهاردة
- أمها: بقولك إيه النهاردة أجازة م الخناق كل سنة وأنتوا طيبين
- أبو أمل: وأنتى طيبة يا حماتي خلاص انزل يا حماسة بس
ما تتأخرش
- حماسة: حاضر كل سنة وأنتوا طيبين
- أم أمل: ياما أقول لذكريا بييجي أول يوم ولا الثاني

عن الكاتبة:

- الكاتبة الشاعرة / فوقية خضر
- من مواليد القاهرة
- حاصلة علي الدكتوراة الفخريه في التنمية البشرية
- عضو في اكاديمية عقل
- عضو عامل في قصر ثقافة عين حلوان



- ١٨٣ الحلقة السادسة عشر بنطلون زكريا:
- ١٨٩ الحلقة السابعة عشر نزلة برد:
- ٩٥ الحلقة الثامنة عشر ابرز تنجز:
- ١٠٣ الحلقة التاسعة عشر عزومة حماتي:
- ١١١ الحلقة العشرين هدوم العيد:
- ١١٧ الحلقة الواحد وعشرين كذب المنجمون:
- ١٢٣ الحلقة الثانية والعشرين زيارة بنت أختي:
- ١٢٩ الحلقة الثالثة والعشرين المرتب طار:
- ١٣٣ الحلقة الرابعة والعشرين عزاء واجب:
- ١٣٧ الحلقة الخامسة والعشرين العين تطلق الحجر:
- ١٤٢ الحلقة السادسة والعشرين مدارس ومدرسين:
- ١٤٩ الحلقة السابعة والعشرين خطوبة الدكتور:
- ١٥٥ الحلقة الثامنة والعشرين سفر عماد:
- ١٦١ الحلقة التاسعة والعشرين كعك العيد:
- ١٦٧ الحلقة الثلاثون ليلة العيد:

حقوق الطبع محفوظة للناشر



أطلس

للنشر والإنتاج الإعلامي

يحظر نشر أو اقتباس أى جزء
من هذا الكتاب إلا بعد الرجوع
إلى الناشر